

## AÑ SAN PABLO PO' CARTA ÑEÑT QUELLCAN ROMO' MARNESHA' ROMANOS

*Atto Pablopa' quellcanet carta añecop ñeñt  
ame'ñetsa netso Romo*

<sup>1</sup> Masheñneshacha' ñaña noçhaneshacha' ñeñtes allohuenes yeçheta anetso ñeñt añ pa'so'cheñ Roma ñeñtes Yomporpa' ahuo't nanac muererra, attoña o' hua'ñerres attoch sapa'cho'ña o'ch e'ñe poctacma pueyochresha' perres. Na Pablón sequellquëne'ña añ carta, ñeñten nanac torretsa Jesucristocop tarro'mar ñeñtecopña llesenserrenña Yompor, nach ma'yoçhrerraya serrpare'tyene' añ cohuen ñoñets ñeñt huetsa Yomporeshot alloch po'ñoçh yequeshperra.

<sup>2</sup> Añ cohuen ñoñetspa' ñeñtara ñoñtsor ñeñt ama't ahua't Yomporpa' e'ñe eñotatuane't ñeñt a'mta'yesaye't po'ñoñ ñeñtcha' atet perrnay te' añeño. Ñeñto'marña ñetpa' quellca'yesete't ñeñt atet otanete't Parets.

<sup>3</sup> Ñaña añ cohuen ñoñets alloch yequeshperra, ñeñtpa' añ serrpare'ten Jesucristo ñeñt Puechemer pen Yompor. Tarraña allempo acheñetos arr patsropa' ñapa' e'ñe David po'mrenñoñ eñalleta, ñeñtara David ñeñt añcha'tarettatse't ahua't.

<sup>4</sup> Tarraña Parets Puecamquëñoñtpa' nanac ahua-mencattache't añecop ñeñt cohuenetyetsa Partso-cop. Ñaña chemerrña allempo Pomporpa' ahuo't

tantater po'rromñoŕpa' allempoña e'ñe eñotuareŕta ñapa' po'ñoçh Yompor Puechemer ñeñŕara Jesucristo ñeñŕ Yepartseshar yepen.

<sup>5</sup> Ñaña yame'ñeñoŕ ñeñŕara Jesucristo, Pomporña e'ñe puemuerenoŕteypa' ahuo't apuey llesens, allochñapa' yach ame'ñatyenahuet ama't eraparen allohuen anetso'mar. Attochña e'ñe cosha'yeññañet Yompor Puechemer.

<sup>6</sup> Ateŕ ñerra'm sa ñeñŕes yeçhetsa Romo, sapa'çho'ña ahuo't sa'hua'ñareŕterra attoch soçter Jesucristo.

<sup>7</sup> Te'pa' e'ñe nehuomŕcha'teñoŕes sa, napa' o'ch notas: Yomporepa'chña sebensare'tamŕpene' ñeñŕ nanac Parets epuet Puechemer Jesucristo ñeñŕ Yepartseshar yepen. Ñetepa'chña socshatene' e'ñe sa seyoçhro allohuenes.

*Atto Pablopa' mueneñ o'ch emo'tenana' romo'marnesha'*

<sup>8</sup> Ñehua, e'ñe ñanompa' añcha' notas, e'ñe neyemteñoŕ Jesucristopa' çhocma neparasyoso'teñ Yompor allohuenacpas, tarro'mar ora allemeñ anetso'marpa' çhocma serrpare'tyenet atto sapa' ahuo' e'ñe cohuen same'ñena.

<sup>9</sup> Yomporpa' e'ñe eñotenen, napa' çhocma nema'yochena socop. Ñaña añ Yomporpa' ñeñŕña nanac nesherven, e'ñe neyoçhrocmañen neserrpare'tateñoŕ po'ñoñ, ñeñŕ atet perrnay Jesucristo ñeñŕara ñeñŕ Puechemer pen ña.

<sup>10</sup> Napa' çhocma nenamueñ Yompor attoch ama't esempopa' o'ch naçchensa' ñerra'm ñach muenats.

11 Napa' atarr nemneñ o'ch nabchensa', o'ch neychatensa' attoch Parets Puecamquëñoõpa' alote' sesen huomenctatsa ñocop.

12 Ñehua, añ noten, e'ñe yame'ñeñoõ parropa' e'ñe pocte' o'ch yeychatanna'ta ñeññ cohuentetsa Yomporecop attoch yeyenpanna e'ñe yame'ñeñoõ Yompor.

13 Ñaña te'pa' o'ch masheñeshacha' ñaña nochaneshacha' notas, ama't ahuañmo'choteñ nesechenañ o'ch nabchensa' tarraña teme'ttsenpa' ama errot nepeñe. Napa' añecop nesechena ñaña attoch seshopa'cho'ña o'te' name'ñateña' acheñenesha' atet ne'pa'yena po'poñ anetso'mar.

14 Tarro'mar ñeññ poctetsa nocoppa' o'ch neñotach allohuen acheñenesha' añ cohuen ñoñets attoch yequeshperra, ama't griegonesha' ñeññ nanac aychatarettsa amapa' ñaña acheñenesha' ñeññ ama aychatareteyaye, ama't ñaña acheñenesha' ñeññ nanac es eñotenet amapa' ñaña ñeññ ama es eñotetso.

15 Ñeñño'marña e'ñe nocsheñeshocmañen nemneñ o'ch neserrpare'tatas saña añ cohuen ñoñets alloch yequeshperra ñeññes yechetsa anetso Romo.

*E'ñe añ yame'ñeñoõ ñeññ cohuen ñoñets, ñeññpa' allochña Yomporpa' a'queshpaterrey*

16 Tarro'mar napa' ama apenca'pahuoye' nenteno añ cohuen ñoñets atto Jesucristo rroma yocop alloch yequeshperra, tarro'mar ñerra'm esesha' ame'ñenaya añ cohuen ñoñets, ñeññpa' ñeññña

Yompor po'huamenc alloch a'queshpaterrey al-  
lohueney ñeñtey ame'ñenaya ña, ñeñtey judione-  
shay e'ñe yanom allotpa' ñaña ñeñt ama judione-  
shayaye.

17 Ñaña añ ñeñtara cohuen ñoñetspa' eñotateney,  
e'ñe yeyemteñoña Jesucristopa' Pomporñapa'  
e'ñech pocte' enteney, allochñapa' allo'nach  
yesen e'ñe yemtenaya ña. Tarro'mar añpa'  
ñeñtara anuaret ahuatoteñ e'ñe Yompor po'ñoño  
allohuenacpay, ñeñt otets atet: Ñeñtey ame'ñenaya  
Yomporpa' e'ñech pocte' entueney ñaña e'ñe  
yeyemteñoñ ñapa' yañapa' corretsayach, ama't  
tayoten errponhuañen.

*Atto allohuen acheñenesha' atpare'chete't  
Yompor*

18 Tarro'mar yapa' yeñoteñ Yompor ñeñt  
pue'ntañotsen e'ñe po'yorochenño'tsa'yena  
allohuen acheñenesha' ñeñt ama pocteye' es  
peneto ñocop, ñeñt sosya'tsañach eñotyenet.  
Ñaña e'ñe atet puepatse'teñoñetpa' ñeñtña  
ama muenatenahueto o'ch orrtanet Yompor  
po'cohuenña ñeñt e'ñe po'ñoch.

19 Ñehua, ama't sosya'tsañach eñotyenetpa'  
tarraña ñetpa' e'ñe eñotueñet ñaña atet penaña  
Yompor, tarro'mar ñapa' ñaña eñotatenahueto e'ñe  
pueyoçhreto ñeñt atet penaña ña.

20 Ama't yeñoteñ Yomporpa' ama entpahuoyaye  
tarraña yenteññañ pueyeçhcatarot po'partsoña  
ñaña allotña yenteññañña po'huomenc  
atarr. Ama't ahuatoteñ allempo e'ñe errte'  
yeçhcatene' pats, alloteñña yenteññañña

po'ñoçh po'partsoteña ñeññapa' errponohuañen.  
Ñeñto'marña acheñenesha' ñeñt yeçhene'  
sosya'tsañpa' amate' errotenot oteto amo'  
eñoteñetoña ñeñt atet penaña Yompor  
po'partsoteña.

21 Ñaña ama't eñoteñetañ ñeñt atet penaña  
Yomporpa' tarraña ama mecha'na'teñetoña  
Parets, ñaña ama coshateñeto ñeñt ora añecop.  
Attoña o'huañcha' cotape'chenet ñeñt sherbets  
Partsocop. Ñeñto'marña pueyoçhretopa'  
o'huañcha' eñoteñet ñeñt cohuentetsa  
Yomporecop; atet ñerra'm pueyoçhretpa' nanac  
a'cheçmetam̃psaret.

22 Ama't otenetañ atarro' es eñotenet, tarraña  
po'ñoçh ñetpa' ahuo't atfa allo'na otatsñañetnenet.

23 O'huañcha' cosheñet ñeñt po'ñoçh Parets  
ñeñt ama arromñañeshayaye. Añachña e'ñe  
coshenet ñeñt yeçhcatyenet ñet. Tarraña ñetpa'  
e'ñe arromñañeto atet es yeçhcatyenet atet ñerra'm  
acheñma't ñaña otma't, ñaña po'yallopma't ñaña  
es berrma't. Ñetñapa' ñeñtach e'ñe ma'yochyenet  
ñeñto'ña e'ñe po'yomporer penet.

*Atto acheñenesha' allo'na senet muenatse'tyese'  
ñeñt nanac sosey enten Yompor*

24-25 Attoña o'huañcha' ame'ñeñet ñeñt  
po'ñoçh Parets, añachña ame'ñenet ñeñt ama  
po'ñoçhoyaye. O'huañcha' ma'yocheñet ñeñt e'ñe  
Yompora', añachña ma'yocheññañet ñeñt e'ñe  
ña pueyeçhcatuar. Ñaña o'huañcha' sherbeñet  
ñeñt e'ñe Yompora', añachña sherbeññañet ñeñt  
e'ñe ña pueyeçhcatuar. Tarraña Yomporepa'chña

ñapueť aye'chočhtatarettatsa tayoteñ ama't  
errponohuañen. Ñeñťpa' attetepa'ch. Tarraña  
atto a'ypo'ñeñet Yomporpa' ñapa'cho'ña e'ñe  
pa'ypo'ñeñoťanet ñańapa' ahuo't muenatyesanet  
o'ch allo'na senet muenatse'tyeset ñeñť nanac  
sosey enten Yompor. Ñeñť atto muenatse'tyenet  
atto o'ch agapannenet, ñeñťoťpa' nanaccha'  
apencočhen yečhenet.

26 Ñeñťo'marña Yompor e'ñe  
pa'ypo'ñeñoťanetpa' ahuo't muenatanet o'ch  
allo'na senet muenatse'tyestset ñeñť nanac  
apencočhen enten ña. Attoña ama't coyanesha'pa'  
o'huañcha' aguėnan puerrollar atto ñeñť e'ñe pocte'  
ateť anareťeyeñ. Ñagattsetach muenannetset o'ch  
agapanna'tyenet ñeñť e'ñe parro pacmacmuet.  
Ama't ñeñťpa' ama atťeye' anareťeye.

27 Ñańa ama't yacmapa' attecmač penet.  
O'huañcha' aguėnan pueťapor atto ñeñť e'ñe  
pocte' atet anareťeyeñ. Ańachña atarr muenen  
o'ch aguėnan pacma e'ñe ñagattsa pacmacma,  
ama't ñeñťpa' ama atťeye' anareťeye. Ñeñť atet  
řannenet yacma parro yacmacmapa' ñeñťpa'  
nanac apencočhen enteñ Yompor. Ñańeñetach  
cońchatetset ñeñť atet řatse'tyenet.

28 Attoña ama't mamesha o'huañcha' mueneñet  
o'ch yerpa'pesyet Yompor. Ñeñťo'marña  
Yomporńapa' pa'ypo'ñeñoťanetpa' ahuo't  
muenatanet o'ch coťape'chatse'tyeset ñeñť ama  
pocteye' enteno ña. Ańachña řatse'tyenet ñeñť  
ama ařapahuoyaye.

29 Ańachña nenet pueyočhreto ñeñť

esocmañen ñeññ ama't mameshapa' ama pocteyaye ñeññara pa'namen sosya'tsañečno. Ñeññpa' añečno: agapanneñets ñeññ ama puerrollareyaye ñaña ñeññ ama puetaporeyaye, ñaña cotape'chatse'tyeñets ñeññ ama cohuenayaye, ñaña ye'chatse'tyeñets, ñaña ye'moñe'tanneño'tpa' o'ch erro't yepoñ po'psheñeñ, ñaña yeye'chapreteño'tpa' o'ch ye'moñe'ch po'psheñeñ, ñaña muetsanna'teñets, eñoseñe'cheñets, ñaña shecanna'teñets, ñaña atrre'moçhen entanna'tueñets, ñaña a'metamñsare'tanna'teñets,

<sup>30</sup> ñaña sasare'tanna'teñets, ama't Yomporpa' ello e'moñe'teñet, ñaña ama't po'psheñeñpa' amach mecha'na'teñeto ama't mamesha, attachña e'ñe ñañeñapa' cohuen entetset, ellopa' ommo'chenetcha'. Añach e'nyenet ñeññ ama cohuenayaye, atto'tcha'ña ama ame'ñeñeto ama't pomporet ama't ñaña pachoret.

<sup>31</sup> Amach çhenaneto pueyoçhreto ñeññ cohuentetsa Yomporecop, amach a'pocateneto po'ñoñ ñeññ atet otenet. Amach es amorrentenaye' enteneto ama't mamesha, amach es a'prentenaye' enteneto ama't mamesha, ñaña amach es amuerenaye' enteneto ama't memesha.

<sup>32</sup> Ñeññ p'atse'tyetsa atetpa' ama't eñoteñetañ e'ñe Yomporesho't anaretetua ama't coñcheñets añecop ñeññ p'atse'tyetsa atetpa' tarraña ñetñapa' ñeññarach atet p'atse'tyesnenet. Ama't pamo'tshetpa' ñerra'm e'ñe attecma p'ohuenet ñametpa' chemerrña allempopa' ñeññach erronaye' coshapretannenet.

## 2

*Atto ama't judionesha'pa'cho'ña atpare'toñete't  
Yompor po'ñoñ*

1 Ñeñto'mar te'pa' o'ch notas allohuenes ñeñtes judioneshas, ñato' sapa' čhate' sotenapañ sapa'cho'ña año'te' atteye' seyčheno sosya'tsañ atet pena po'potantañ. Tarraña amate' errotenoť soto atet tarro'mar allohueneypa' e'ñe attecma yepena. Ñerra'm čha yoten po'psheñeñpa' ama cohuenayaye, tarraña atetpa' yañeña atet otetsa ama't erra'tsenoťeya ñeñtey atet otets.

2 Tarraña ama't atetpa' yeñoteñ Yomporpa' čhocmach tsa'taterrana allohuen ñeñť atet es p̄atse'tyets, errotencha' e'ñe pocte' ent ña.

3 Sapa' čhate' sotenapañ saptate' atarr morrentensa Yompor, amachña tsa'taterrso sa, ama't sapa'cho'ña attecma sepatse'tyen sosya'tsañ ñeñť atet pena po'potantañ, tarraña sapa' čha sotenanet ñetpa' amo' cohuenayayeto.

4 Amapa' sapa' čhate' sotenapañ Yompor puemuereñoť nanacpa' amach tsa'taterrso tarro'mar teme'ttsen ama erroť penso, atta cohuenes. Ama't señoťeñe añecopña teme'ttsen muerensa Yompor attoch ellopa' o'ch e'ñe soctape'chuerr cohuen allohuenes.

5 Tarraña ñerra'm atta se'čharrtena seyočhro, amachña soctape'chuerro cohuen, allempochña allo'nach sesen atontatnomue' attoch tsa'tatuerrsa Yompor esempohuañencha' tsa'tatuerrya allohueney errotencha' e'ñe pocte' entyesuerrey e'ñe puesheña'ttsoy. Allempoña allohuen acheñenesha'pa' o'ch e'ñe



eñotueret ñeñtcha' e'ñe atet tsa'tatuerrya e'ñe puešheña'ttsoy, ñeñtpa' e'ñech pocte'.

<sup>6</sup> Ñaña tsa'tuerryach allohueney ñeñtey corra'yetsa arr patsro errotenete' yeḡa'yena e'ñe ñocop.

<sup>7</sup> Ñerra'm chocma yoctape'chen e'ñe cohuen Yomporecop, ñaña ñerra'm chocma yocteññañ po'cohuenña, ñaña ñerra'm añ ye'nen attoch ñapa' e'ñech cohuen entuerrey, ñaña attoch aphuerreycha' ñeñt alloch yocrrerra errponohuañen, allempoña po'ñočpa' aphuerreycha' attoch yapa' corretsayach yocsheñeshocmañen tayoten e'ñe erponañohuen.

<sup>8</sup> Tarraña ñerra'm yapa' aña cohuen yenten ñeñt yemnen ya, Yomporña po'ñoñña' ñerra'm cha yatpare'teñ, aña yocten ñeñt ama cohuenayaye Yomporecoppa' ñaña po'yoročhenñoť po'ñočpa' chocmach tsa'tatuerrya.

<sup>9</sup> A'coñchatareťterrach allohuen ñeñt cotene' ñeñt ama cohuenayaye arr patsro, amuročhtatareťterretcha' allohuenet ñeñt atet petset, ama't ñanom atet ñerra'm judionesha' alloťpa' ñaña ñeñt ama judioneshayaye.

<sup>10</sup> Tarraña allohuen ñeñt cotene' ñeñt cohuentetsa Yomporecop arr patsropa' Yomporña' cohuencha' enterranet, aphuerranetcha' alloch e'ñe cohuentapreteret, aphuerranetcha' ñaña attoch cosha'huerret e'ñe cohuen pueyočhreto. Atetcha' perran allohuen ñeñt e'ñe cohuen corra'yetsa, ama't ñanom atet ñerra'm judionesha' alloťpa' ñaña ñeñt ama judioneshayaye.

<sup>11</sup> Tarro'mar Yomporpa' ama ñapťa judionesha'

morrenteno, añña ñaña allohuen acheñenesha'pa' e'ñe morrentueña. Ñaña attecma Yomporpa' ama ñapta coñchatenano ñeñt' ama judioneshayaye, ñapa' ama't judionesha'pa' e'ñech coñchatuer.

12 Ama't atet ñerra'm ñeñt' ama judioneshayaye ñeñt' ama echenaye Moisés po'ñoñ, ñerra'm añ cotenet ñeñt' ama cohuenayayepa' elloña ñetpa' chenca'huerretcha', tarraña ñetpa' amach añeye' a'chencaterrahueto Moisés po'ñoñ. Tarraña judionesha'ñapa' ama't echeññañetañ Moisés po'ñoñ, tarraña ñerra'm attera, añach cotape'chyenet ñeñt' ama cohuenayaye, ñetpa' añachña a'chencaterrahuet ñeñtara Moisés po'ñoñ.

13 Tarro'mar Yomporpa' ama pocteye' ente-nano ñeñt' atta e'muene' orrena po'ñoñ all ser-ppare'teññañet. Añña pocte' enten Yompor, o'ch atet penet ñeñt' e'ñe atet oten po'ñoñ.

14 Ñehua, o'ch yoctape'ch ñeñt' atet pena acheñenesha' ñeñt' ama judioneshayaye, añenesha' ñeñt' ama echenaye Yompor po'ñoñ. Ñetpa' ama't ama echeneto Yompor po'ñoñpa' errotenopa' e'ñe pueyoçhretoť poctape'cheñotetpa' ahuo'tcha' atet pa'yenet ñeñt' e'ñe cohuentetsa Yomporcop, ñeñt' e'ñe atet o' anuaretetua Yompor po'ñoño ñeñt' atet poctetsa ñocop. Ama't ama echeneto Yompor po'ñoñ ñeñt' atet aquellcaretpa' tarraña pueyoçhretoña' e'ñe eñoteñet erra'tsente' ñeñt' cohuentetsa.

15 Ñeñt' atet pa'yene' ñeñt' cohuentetsa, yapa' yeñoteñ pueyoçhretoña eñoteñet ñeñt' atet cohuentetsa, ñeñtara ñeñt' atet oten

Yompor po'ñoñ ñeñt o' anaretetua. Ñehua, o'ch yetma'ntacha atet ñerra'mrrate' Yompor po'ñoñpa' e'ñech pueyoçhreto aquellcarettena. Tarro'mar e'ñe ñet pueyoçhreto'tpa' eñotenet ñerra'm esempopa' o'ch pøhuerret ñeñt ama cohuenayaye, ñaña eñotenet ñerra'm esempopa' o'ch atet penet ñaña ñeñt e'ñe cohuen.

16 Tarro'mar yeñoteñ esempohuañen Yomporpa' eñotaturreycha' ñeñt ora allpon ya'nasotena te'. Yompor Puechemerña ñeñt Jesucristo ñach otats attoch tsa'tatya. Ñeñtpa' e'ñe atet ñeñt o' notuas ñeñtara noten allempo neserrpare'ten añ cohuen ñoñets alloch yequeshperra.

*Atto judionesha' ama't echenetañ Yompor po'ñoñ patpare'teño'tetpa' nanac ayohuarettenet*

17 Te'pa' o'ch alla neserrpare'taterrserr ñeñtes judioneshas. Ñehua, sapa' cha soten sapa' judioneshaso' ñaña añ atarr seyemtana ñeñt nonase't Moisés, ñaña atarr sommo'chena tarro'mar sapa' soteneñ e'ño' puechemer penes Yompor.

18 Ñaña soteneñ e'ño' seño'tueñ ñeñt atet muenen ña. Ñaña po'ñoñ ñeñt atet anare'tpa' ñeñto'ña seyçhatene' ñeñt atarr cohuentetsa Yomporecop.

19 Ñeñto'marña sapa' soteneñ, po'ñoçh atarro' es señoten, attoch seyçhateñ po'potantañ ñeñt ama es eñoteneto. Cha sottena ñerra'm ñeñteso' echa'nene' ñeñt ama entetso, amapa' ñerra'm ñeñteso' çhoyo'tam'pene' ñeñt chopeñe'chets checmeto.

20 Ñaña sapa' çhate' sotenapañ po'ñoçh atarrte' cohuen seyçhateñ po'potantañ ñeñt

ama eñotenaye ñeñt̃ cohuentetsa, ñeñt̃ atet̃ petsa ñerra'mrrate' cheshatollesha' ñeñt̃ ama eñotenana' ñeñt̃ cohuentetsa. Ñaña sapa' soteneñ po'ñocho' esocmañeno' señotuahuen, ora ama't̃ allpon ñeñt̃ po'ñoçhotets, tarro'mar sapa' secheññaño' Yompor po'ñoñ ñeñto'ña esocmañen señotatene'.

<sup>21</sup> Ñehua, te'pa' o'ch notas, sapa' ama't̃ o' atarr seyçhateñ po'potantañpa' tarraña amaña seyçhatenoña e'ñe sañeña ñeñt̃ cohuentetsa Yomporecop. Ñaña sapa' ama't̃ o' atarr seserrpare'ten atto ama etanna'tpahuo, tarraña sañapa' çhocma setanna'tyena.

<sup>22</sup> Ñaña sapa' ama't̃ seserrpareneñ atto amo' achtapretpahuo taporets, tarraña elloña sapa' çhocma sapretannena setapor. Ñaña sapa' ama't̃ setsena'teneñ ñeñt̃ ayeçhcataret̃, tarraña sañapa' ahuo't̃ seyorayesña puerahuot̃ ñeñt̃ atarr coçhnesha' ñeñt̃ allo arca'tam̃penet̃ ñeñt̃ po'yoser penet̃. Ñeñt̃ atet̃ etetspa' ñeñt̃pa'çho'ña attecma enteñ Yompor ama aṣapahuoyaye atet̃.

<sup>23</sup> Ñaña sapa' nanac sommo'chena tarro'mar sapa' secheññaño' Yompor po'ñoñ ñeñt̃ atet̃ anaret̃ ama't̃ ahuaṭoteñ. Tarraña ama't̃ atteñpa' amaña atteye'ña sepeno ñeñt̃ atet̃ oteney añ ñoñets ñeñt̃cha' atet̃ seṣa. Yomporñapa' çha sottatateñ ñerra'mrrate' ñapa' ama es eñotpeno ama't̃ mamesha.

<sup>24</sup> Ama't̃ atet̃ oten Yompor po'ñoñ ñeñt̃ atet̃ anuaret̃ ahuaṭoteñ, ñeñt̃pa' atet̃ oten: "Ama't̃ ñeñt̃ ama judioneshayayepa' achm̃are'teñet̃ Yompor e'ñe sesharrmorot̃, e'ñe seṣatse'tyeñoṭ̃ ñeñt̃ ama't̃ mameshapa' ama pocteye' enteneto

ama't ñame'ttseta."

*Atto ñeñt po'ñoch puechemer pen Yompor*

25 Po'ñochna ñerra'm añ semnen o'ch setsoteññañ Moisés po'ñoñ ñeñt atet anuaretpa' añ poctetsañ o'ch setsorrannena, tarro'mar ñeñtpa' sherbeneñ. Tarraña ñerra'm elloña satpare'teññañ po'poñ Moisés po'ñoñ ñeñt atet oteneý ñeñtcha' atet yeþapa' ama't atto o' sa'tsorraretetuapa' ñeñtpa' e'ñe orrena, attecma ñerra'm ama atorrareteyaye.

26 Ñeñto'marña yeñoteñ ñaña, ama't ñeñt ama atorrareteyayepa' ñerra'm añ atet penet ñeñt atet oteneý Yompor po'ñoño'tpa' ama't ama atorrareteyaye, Yomporña'p' atetcha' enteneý ñerra'm e'ñe puechemer peney po'ñoch. Attecmach enteneý ñerra'mrrate' ñeñt atorraret, tarraña e'ñech puechemer perrey po'ñoch.

27 Ñeñto'marña yeñoteñ ama't ñeñt atta corretsa atet eñalleta, ama atorrareteyaye, ñerra'm añ atet penet po'ñoch ñeñt atet oteneý Yompor po'ñoño'tpa' ñetña'p' pencaterrsetcha', tarro'mar ñetpa' ello metanennaset ñeñt allpon cohuen o' seþohua Yomporecop. Tarro'mar sapa' satpare'teññañ po'ñoñ ñeñt atet anaret. Metanenset sa, ama't sapa' secheññañeñ Yompor po'ñoñ ahuatoteñ, ñaña ama't sapa' e'ñe atorrareteseñ.

28-29 Ñeñt e'ñe po'ñoch puechemer pen Yomporpa' ama ñap'tayaye ñeñt eñalletetsa judionesheshot. Añña po'ñoch e'ñe puechemer pen ñeñt e'ñech cohuen co'tape'chenet pueyo'chreto ñocop. Ñaña tsorraneñets e'ñe

atta yechtsopa' ama esoyaye Yomporecop. Aña sherbets Yomporecop atto cohuen es yoctape'chen e'ñe yeyoçhrot. Ñaña ñeñtpa' huena e'ñe Parets Puecamquëñoñ, ama añoŧeye' hueno o'ch e'ñe yeŧa'yesua ñeñt aquellca'yesareŧ esheccha'ña puechemer perrey Yompor. Ñerra'm atetcha' yoctape'cherr cohuen yeyoçhro Yomporecoppa' attochña Yomporpa' e'ñech pocte' entuerrey, ama'tcha' acheñenesha'pa' ama pocteye' entenyeto.

### 3

<sup>1</sup> Te'ña sapa' çhate' sotenapañ judionesha'pa' amate' atarr sherbeno amapa' çhate' sotenapañ ñeñt atto tsorrannenetpa' amate' es sherbeno. Tarraña ñeñtpa' ama atteyaye. Po'ñoçhca'ye atarr sherba'yen judionesha'.

<sup>2</sup> Nehua, o'ch yot ñanom ñeñt atto sherbenet. Ñetña aparetet Yompor po'ñoñ ñanom atto ñetcha' a'poŧenet ñeñtara ñoñets.

<sup>3-4</sup> Tarraña ama allohuenacmaye' ame'ñeneto ñeñt atet oteney Yompor po'ñoñoñ. Tarraña ama't atet pohuanenetpa' amate' erroŧenoŧ a'psateretoña Yompor ñeñt atet oteney po'ñoñoñ, ama't mamesha. Ñapa' çhocmach a'poctatuonay po'ñoñ ñeñt atet o' otueney. Ama't allohuen erra'tsen acheñerpa' ama'tcha' ama a'poctatueneto ñeñt atet eñoreneta' tarraña señoche'pa'ch, Yompora e'ñe ñapŧa, ama puenesho po'ñoñ. Ama't atet oteney Yompor po'ñoñ ñeñt atet aquellca'huareŧ ahuatoteñ, ñeñtpa' all atet oteney:

Allohuen acheñenesha'pa' eñotetepañña atto  
 Yomporpa' ama puenesho po'ñoñ, ñaña  
 ñerra'm esesha' atta otatse'tyets atto  
 Yomporpa' año' pocteye' es peno, tarraña  
 eñochetepañña Yomporña e'ñe pocte' es pets.

<sup>5</sup> Ñeñto'mar napa' o'ch notas, e'ñe ya yepeñoñ  
 ñeñt' ama cohuenayaye, attoña yorrtateññañ  
 Yompor ñapa' ñaña e'ñe cohuenare' es pa'yets.  
 Ñehua, ñerra'm yo'chñaroñ atet yeyenpapreteñ  
 Yompor orrtate' po'cohuenñapa' sañapa' chate'  
 sotenapañ, Yomporpa' amate' pocteyayeña o'ch  
 tsa'taterrya yo'chñaro'mar. Ñehua, aña' atta  
 notenes atet tarro'mar ñeñtpa' atet eñosatse'tyen  
 acheñenesha'.

<sup>6</sup> Po'ño'ch yeñoteñ e'ñe pocte' atetcha'  
 tsa'taterrya Yompor. Tarro'mar ñerra'm ama  
 pocteyaye ñeñt' atet pena Yomporpa' ñeñtepñapa'  
 amate'cho' erroteno eñoteñe ñaña atetcha'  
 entyesuerrey allohueney esempohuañen.

<sup>7</sup> Ñaña yaña ñerra'm esempo yeñosatse'tyen  
 es ñeñt' ama atteyayepa' attoña yorrtateññañ  
 Yompor ñapa' ñaña e'ñe po'ño'chare' ñeñt' atet es  
 otyen. Ama't e'ñe yeñosatse'teño'tpa' nanaccha'  
 yecohuentateññañ Yompor. Ñehua, ñato' sapa'  
 chate' atet soten, ñerra'm atet yeyenpapreteñ or-  
 rtate' Yompor po'cohuenña, amate' pocteyayeña  
 o'ch attera enteney Yompor ñerra'm ñeñtey atarr  
 sosey es pa'yets.

<sup>8</sup> Sapa' aña sotatse'tyen, ama'tpa' a'papo'ch  
 ñeñt' ama cohuentetsonña allochñapa' e'ñe attotpa'  
 o'ch yorrtaten ñeñt' cohuentetsa. Puesheña'tets  
 acheñ e'ñe pueyllatate'teñme'chatset neñoñpa'

otyenet, ñeñtñächo' atarr otenña Pablo. Tarraña Yomporcha'ña tsa'taterrahuet ñeñt atet otatse'tyenet. Ñaña ñeñtpa' e'ñe pocte' atsa'tataretterrepepa'chña.

*Atto allohueney ñeñtey acheñey čhocma ochñačecmay*

<sup>9</sup> Ñehua, sapa' čhač'e' sotenapañ yapa' po'ñočhte' Yomporpa' enteney ñeñtey judioneshay e'ñe cohuenare' es yeḡa'yen. Ñaña čhač'e' sotenapañ po'potantañ ñeñt ama judioneshayayepa' ñetñapa' amo' atteye' entenaneto Yompor. Tarraña ama't mameshapa' ama atteyaye. Tarro'mar napa' o' neñotatuanmas atto ama't allohueney ñeñtey acheñey čhocma ochñačecmay ama't ñeñtey judioneshay. Ama't ñaña ñeñt ama judioneshayayepa' e'ñe attecma ochñačecmay.

<sup>10</sup> Ama't Yompor po'ñoñ ñeñt atet aquellca'huaret ahuatoteñpa' e'ñe attecma oteney, ñeñtpa' atet oten:

Ama't puesheñarročeyapa' ama eñallyeña ñeñtey e'ñe pocte' pene' ñeñt poctetsa Yomporecop.

<sup>11</sup> Ñaña ama't puesheñarročeya ama čhennayo yeyočhro attoch yeñotoñ Yompor po'cohuenña. Amachña añeye' ye'nen ñeñt atet muenen Yompor, ama't puesheñarročeya.

<sup>12</sup> Ama't allohueney ahuo't yesa'neñ Yompor, ama't mamesha o'huañ yesherḡa' ñocop, ama't allohueney. Ama't puesheñarročeya ama eñallyeña ñeñtey e'ñe cohuen es pets Yomporecop.



- 13 Atto e'ñe ya yeñosatse'teñoñ sosya'tsañechno yeñyañña'pa' cha ottena ñerra'mrrate' apampaña ñeññ atorampsaret. Atto yeñen yenamotpa' nanaccha' yeshcannena. Atto yeshquëñ yamo'ts yenamotpa' chach yotena ñerra'mrrate' shecheþ amtsañeþ atserr yepene' puenamot.
- 14 Ñaña ñetpa' añach eñnotenet parrnomarña, ñaña chach chemama'tannenet.
- 15 Ñaña pa'tsrre'mueñoñetpa' machayotach muetseñet acheñ.
- 16 Pottatse'teñoñetpa' chach nanac muerochtatyënet acheñenesha', nanaccha' llecatyënet.
- 17 Ama't ahuatoteña'pa' ama añeye' yeçheneto attoch e'ñe muetsoññenoñpa' cohuen yemtannenet.
- 18 Ñaña ama't mameshapa' amach amcha'na'tpahuoye' enteñeto Yompor. Arrpa' allohua ñeññ notenes e'ñe Yompor po'ñoñoñ ñeññ atet aquellca'huaret ahuatoteñ.
- 19 Ñaña yapa' yeñoteñ ñeññ atet otyen Yompor po'ñoñ ñeññ aquellca'huaret ahuatoteña'pañecopña oten ñeññ echene' po'ñoñ, amaña añecpayaye ñeññ ama echaye'te po'ñoñ allempo. (Atet ñerra'm judionesha'pa' ama't ahuatoteñ echeññañet Yompor po'ñoñ, ñeññara ñoñets ñeññ o' notuanmas ñorra' arr.) Ñeñto'marña ama't puesheñarrotesa sa ama't ñeññes judioneshaspa' amate' errotenot soto, sapa' e'ño' cohuen entenes Yompor. Attoña yeñoteñ ama't allohueney ñeññey

corretsa añe patsropa' ama pocteye' enteney Yompor ñeñt atet yepa'yena.

20 Tarro'mar yeñoteñ e'ñe yetsotateñoña añ ñoñets ñeñt atet anaret ahuatoteñpa' amach errotent ama't puesheñarroñeya e'ñe ya'pocatoña yañeña attoch e'ñe pocte' enteney Yompor. Añecpaña sherbeney añ ñoñets ñeñt atet anaret, ñeñtcha' yeñotatene' po'ñoçh yapa' nanac ochñañ enteney Yompor.

*Atto Yomporpa' e'ñech pocte' entueney, e'ñe yeyemteñoña Jesucristo*

21 Tarraña te'ña Yomporpa' o' eñotatey atto ellonetpa' eñall po'poñ attoch pocte' entueney Yompor, ñeñtpa' ama añeyaye o'ch yetsotatuen ora ñoñets ñeñt atet anaret ahuatoteñ. Tarraña Yompor po'ñoñ ñeñt anuaret ama't ahuatoteñpa' ñeñtarecpa eñen añecop.

22 Attochña Yomporpa' e'ñech pocte' entenamet ama't allohuen erra'tsencha' yemtenaya Puechemer ñeñtara Jesucristo. Ama't allohueney attecmaçh e'ñe pocte' entueney, e'ñe yeyemteñoña Jesucristo.

23 Tarro'mar allohueney attecmaçh e'ñe yo'chña'tuen. Ama yetsoteññañe Yompor po'cohuenña ñeñt e'ñe atet muenen ña.

24 Ñeñt attoch e'ñe pocte' enteney Yomporpa' ñeñtpa' atet: E'ñe puemuereñoñey ahuo't apuey Puechemer ñeñt Cristo Jesús atto ñachña e'ñe yetsa'tuoya allohuen yo'chñar. Ñeñtpa' e'ñe atta apuey Yompor, ama eso yetsa'teño ama't coñe'ta.

25 Ñaña Yomporpa' ahuo't orrtatan Puechemer Cristo ñeñcha' rromosets aña patsro, o'ch ashataretta po'rras e'ñe yocop. Allochñapa' e'ñech e'shohuaretterra yo'chñar ñerra'm yeyemterach ña. Ñaña ahuo't atet ña Yompor attoch yeñoçh, ñapa' e'ñe pocte' atet pe't ahuať, tarro'mar acheñenesha' ñeñť corratse't ahuaťpa' Yomporpa' atta ahuantenanet po'chñar, ama ahuenaye' atsa'tatarettuerreto po'chñaret. (Tarro'mar ñapa' e'ñe eñoteñ, Cristochña tsa'tuerrahuet po'chñaret ñamet ñeñť allpon ame'ñaye't ña ahuať.)

26 Ñaña ahuo't atet ña Yompor allochñapa' attoch yeñoçh ñapa' e'ñe pocte' atet pena; teme'ttsen attochña e'ñech pocte' enteney e'ñe yeyemteñoť Jesús.

*Atto e'ñe yeña'yeñoťa yañeña ñeñť cohuen yenten ya, Yomporñapa' amach cohuenaye' entenye*

27 Ñehua, atto e'ñe yeyemteñoťa Cristo Yomporñapa' e'ñech pocte' enteney, ñeñťo'marña o'huañcha' eñalleta ñeñť allo yommo'chena e'ñe yañeña, ñeñť e'ñe yetsotateñoť. Tarro'mar e'ñe yeña'yeñoťa yañeña ñeñť e'ñe cohuen yenten ya, Yomporñapa' amach pocteye' entenye.

28 Ñeñťo'marña te'pa' e'ñe po'ñoçh yeñoteñ e'ñe yeyemteñoťa Cristopa' e'ñech pocte' enteney Yompor ama't ama yetsoteno ñoñets ñeñť atet anareť ahuaťoteñ.

29 Ñehua, o'ch noterrserr masheñnesha judioneshacha', ñato' sapa' čhaťe' sotenapañ Yomporpa' saptate' Seyomporer sepeñ ñeñťes judioneshas, amate'ña añecpa'nayaye ñeñť ama

judioneshayaye. Tarraña napa' o'ch notas, ama't ñeñt' ama judioneshayayepa' ñetpa'cho'ña Po'yomporer peñet.

<sup>30</sup> Tarro'mar e'ñe patrira Yompor. Ñaña ama't erra'tsena judionesha' ñeñt'cha' ame'ñerraya Cristopa' Yomporña' e'ñech pocte' entenanet. Ñaña attecma ama't erra'tsena ñeñt' ama judioneshayaye ñeñt'cha' yemterraya Cristo, ñetpa'cho'ña e'ñech pocte' entenanet Yompor.

<sup>31</sup> Ñato' sa te'pa' chate' sotenapañ yeyemteñoñ Cristo, te'pa' Yompor po'ñoñ ñeñt' atet anaret ahuatoteña' o'ch yehuapore'ch, o'huañcha' sherba'y. Tarraña o'ch notas, elloña attoña e'ñe yeñoten, ñeñto'marña Yompor po'ñoña' atarr sherbeney.

## 4

### *Atto Yompor ahuatpa' e'ñe pocte' entane't Abraham*

<sup>1-2</sup> Ñehua, te'pa' o'ch neyerpatasa ñeñt' atet pe't ahuat yatañ Abraham. Ñapa' ama añoñeye' pocte' eñche'teña Yompor e'ñe ñañeña puetsotateñoñ ñeñt' cohuen ente't ña. Ñeñto'mar yatañ Abrahampa' ama eñalle ama't mamesha attoch ommo'chena ama't Yomporesho.

<sup>3</sup> Tarro'mar yeñoteñ ñeñt' atet oten Yompor po'ñoñ ñeñt' aquellca'huaret ahuatoteñ. Ñeñt'pa' atet oten: "Abrahampa' e'ñe atta yemtane't ñeñt' atet oche't Yompor, ñeñto'mar allempoteña Yomporpa' e'ñe pocte' eñche't e'ñe atta."

<sup>4-5</sup> Ñeñto'marña yeñoteñ yapa'cho'ña ama añoñeye' e'ñe pocte' entenye Yompor e'ñe

yettorreoñõ ñeññ cohuen yenten yañeña. Añõcha'ña e'ñech pocte' enteney Yompor e'ñe atfa, ñerra'm esempo yapa' o'ch e'ñe yeyemtera ñeññ atet oteney; allochñapa' attoch e'ñech pocte' entueney ya ñeññey ochñatey. Tarro'mar e'ñe pocte' enteney e'ñe atfa, ama es yetorreñoñey' ñeññ cohuen yenten yañeña. Ñehua, ñato' o'ch yetma'ntacha atet. Ñerra'm esempo yetaruasen yepatronaresho, ñerra'm allempoch tsa'tyet yetaruaso'tpa' ama yoteno e'ñe atfa apuenyet quelle, yetaruaso'tña tsa'tenyet. Tarraña attoch pocte' enterrey Yomporpa' ama atteyaye. Ñapa' e'ñe atfa pocte' enteney, ama e'ñe ya yetorreñoñey' ñeññ cohuen yenten ya attoch pocte' enteney Yompor.

<sup>6</sup> Ñaña ama't yatañ Davidpa' ñeññecpaña eñose't ahuat. Ñapa' atet ote't nanac cosheñtso'tseney ñeññey e'ñe pocte' enteney Yompor e'ñe atfa, ñeññpa' ama añoñeyaye o'ch es cohuen yepa'yes e'ñe yañeña.

<sup>7</sup> Ñeññpa' atet ote't David:

Nanac cosheñtso'tseney ñeññey o' a'pretna'huare'tterra yo'chñar, ñeññey amach allo'na yerpuerrnaye'te Yompor yo'chñar.

<sup>8</sup> Ñaña nanac cosheñtso'tseney ñeññey Yomporpa' amach allo'na otteñe'chnenye yo'chñaro'mar. Arrpa' allohua ñeññ atet ot ahuat yatañ David.

<sup>9</sup> Ñaña añ cosheñetspa' yeñoteñ ama ñapñecpayaya ñeññ judioneshacop ñeññara

ñeññ atsortaretnesha'. Añecpa'naña ñeññ ama judioneshayaye ñeññ ama atsortaretayayeto. Ñehua, ñeññpa' attotña yeñoteñ. O' notuanmas atto Abrahampa' e'ñe atta yemtane't ñeññ atet oche't Yompor, ñeñño'marña Yomporpa' e'ñe pocte' eñche't e'ñe atta.

<sup>10</sup> Ñehua, te'pa' o'ch yoctape'ch allempo Yomporpa' e'ñe pocte' entane't Abrahampa' allempo Abrahampa' ama atsortarettena', tarro'mar allempopa' ama orrtena' atteñats.

<sup>11</sup> Tarraña elloñapa' ahuo't tsorratena Abraham; ñeññpa' ñeññcha' eñotaterrahuet po'ñoçh Yomporpa' o' pocte' entenan Abraham e'ñe pueyemteñoña, ama't allempo ama atsortarettena'. Ñeñño'marña atet pa ahua't attoch pompor pohueret ama't ñaña allohuenet ñeññ ama atsortaretayaye; tarraña ama't ama atsortaretayayeto, e'ñe pueyemteñoñeta Yomporpa' e'ñech pocte' entenanet e'ñe atta.

<sup>12</sup> Ñaña ñeñño'mar atet pa attoch pompor pohuer allohuen ñeññ atsortaret, tarraña añach ñapue't pompor perre' ñeññ po'ñoçh yemtenaya Yompor. Tarro'mar ama añecpaye' pompor peñeto atto atsortarettenet, añecopña pompor peñet e'ñe pueyemteñoñeta Yompor ñeññ e'ñe atet pete't pompor et Abraham, ama't allempo ama atsortarettena'.

<sup>13</sup> Yapa' yeñoteñ ahua't Yomporpa' ahuo't otan Abraham o'ch apuer erracmañen pats allohuen puechemereshohuen esempohuañen. Ñaña atet otan Yompor Abrahampa' ama puetsotateñoñeye' añ ñoñets ñeññ atet anaret ocheña Yompor. Añña

e'ñe pueyemteñoťa Yompor atet och, tarro'mar Yomporpa' e'ñe pocte' eñch.

14 Ñerra'm po'ñoçh yetsotateñoťa añ ñoñets ñeñt atet anaret aphuerryeñ añ patspa' yapa' e'ñete' orrena yeyemteñañ Yompor; tarro'mar ñerra'm atteñpa' Yomporpa' amate' a'pocatanñeña po'ñoñ ñeñt atet otan ahuat Abraham.

15 Ñaña ñerra'm añ yoçten añ ñoñets ñeñt atet anaretpa' nanaccha' a'coñchataretey ñerra'm ama yetsotueno ora allpon ñoñets. Ñaña ñerra'm ama eñallñe añ ñoñets ñeñt atet anaretpa' amate' errotent coñchatyeto tarro'mar amate' eñallñe ñoñets ñeñtcha' ya'pote' ñeñt ochñartsotets.

*Attoch a'naterrya Yomporpa' ñeñtpa' e'ñech yeyemteñoťa ña*

16 Ñeñto'marña yeñoteñ attoch a'naterrya Yompor ñeñt atet otuahuapa' ñeñt po'ñoçhpa' e'ñech yeyemteñoťa ña attochña e'ñe puemuereñoçey e'ñech a'natuerrya allohueny. Amach ñapñayaya judionesha' ñeñt cotene' añ ñoñtsor ñeñt atet anaret, añecpa'naña allohueny ñeñteycha' yemterraya Yompor e'ñe attecoptar atet pe't ahuat yatañ Abraham. Tarro'mar ñapa' po'ñoçh yatañ yepen allohueny.

17 Ama't Yompor po'ñoño ñeñt atet anuaret ahuatoteñpa' all orrtena ñeñt atet Yomporpa' otan ahuat Abraham, ñeñtpa' atet ochet: "Shonte' pa'namen acheñpa' ñetñapa' pomporcha' pohuerrpet. Añpa' e'ñe na atet o' neponaß." Ñeñto'mar yeñoteñ Abraham e'ñe pueyemteñoç Yomporpa' atet eñchet Yompor ñapa' pomporcha'

per shonte' pa'namen acheñ. Ñeññapa' ñeññara Yompor ñeññ nanac ahuamencat ñeññ eñotene' o'ch tantaterran ama't ñeññ rromuets, ñaña ñeññ eñotene' e'ñe po'ñoñoŕpa' o'ch orrtatan ama't ñeññ ama eñalle te'.

18-19 Allempo Yomporpa' atet otan Abraham "peshoŕpa' merenach shonte' pa'namen acheñ ñeññcha' pŕomporterraya" allempo Abrahampa' o' nanac po'nme'ten—charroch çharra' charte' echen. Tarraña Abrahampa' ama't eñotena o' nanac po'nme'ten, o' meten allempo attoch chemere'ten, ñaña puetapor Sarapa'cho'ña o' nanac po'nme'ten, amate' errotenoŕ cheyore'terro, tarraña Abrahampa' ama queçhpuenano atfo yemtenana ñeññ atet otue Yompor. E'ñe pueyemteñoŕ Yomporpa' allo'na sen cohuene' Yompor o'ch aŕ ama't patrra puechemer.

20 Ama echarrteno pueyoçhro ama't mamesha añecop ñeññ atet o' otue Yompor. Allo'na sen yemuetnomaya Yompor ñeññ nanac ahuamencat pene'. E'ñe pueyemteñoŕan Yompor, ñapa' çhocmach otaŕsa'tyesanete't Yomporpa' ñaŕŕa atarr ahuamencat.

21 Tarro'mar eñoche't e'ñe Yompor po'huamencoŕ, po'ñoçhpa' o'ch aŕ ama't patrra puechemer ñeññ atet o' otue.

22 Ñeño'marña Abraham e'ñe pueyemteñoŕan Yompor Yomporña' e'ñe pocte' eñche't.

23 Tarraña añ ñoñetspa' ama ñaŕŕeçpayaye Abrahamacop anarete.

24-25 Yocpa'naña anarete't allohueney ñeññey



yemtenaya Yompor, atto ñapa' a'rroyonay Puechemer ñeñt Jesús ñeñtcha' rromats e'ñe ya yo'chñarecop, ñeñtara Jesús ñeñt Yepartseshar yepen, ñaña atto Yomporpa' tantaterran Puechemer po'rromñoť, attoch yeñoch yo'chñarpa' o' e'ñe atsa'tareťetua. Ñeñto'marña te'pa' e'ñe yeyemteñoť Yompor ñeñt atto a'pocatonay, yapa'cho'ña e'ñech pocte' enteney yaña.

## 5

*Atto e'ñe yeyemteñoť Yompor, e'ñech pocte' enteney, atarrcha' cosheñtso'tseney*

<sup>1</sup> Ñeñto'marña te'pa' yeñoteñ e'ñe yeyemteñoťa Jesucristo, Yomporñaapa' e'ñe pocte' enteney, o'huañcha' yoročheno'tseney Yomporeshoť, țarro'mar Yepartseshar Jesucristopa' ahuo't a'pocatuerrnay yo'chñar Yomporesho.

<sup>2</sup> E'ñe attoña Cristopa' çhapterrey Yompor puemuereño attoch çhocma bensare'tam̄peney; ñeñtpa' e'ñe yeyemteñoť Cristo. Ñaña yapa' e'ñech yocsheñsha' yecueñ esempohuañencha' e'ñe poc-tacma yecohuentapretera Yompor.

<sup>3</sup> Ñaña ama't yemueroçhteñoť o'ch yocshena țarro'mar yeñoteñ e'ñe yemueroçhteñoťpa' allempoña yocťape'chen attoch ahua mencat pa'y Yompor attochña ya'huanten allohuen ñeñt echarr yentyen.

<sup>4</sup> Ñaña attoña ya'huanten allohuen ñeñt echarr yentyenpa' yapa' yeñoteñ Yomporñaapa' e'ñech cohuen entuerrey. Ñaña ñerra'm yeñoteñ Yomporpa' e'ñe cohuen enterrey, yapa' e'ñe

yeyemteñoť o'ch yecuerr ñeñť o'patatenya Yompor.

<sup>5</sup> Ñaña e'ñe yecueñoť ñeñť o'patatenya Yompor ñapa' ċhocmach a'pocatenan po'ñoñ ñeñť atet oten yocop. Yapa' ama't esempapa' amach es ye'naterraye'te po'poñ, tarro'mar Yomporpa' ahuo't apuey Puecamquëñ ñeñťcha' yeċhetsa yeyoċhro ñeñťcha'ña yeñotatene' atto Yomporpa' nanac morrentenya.

<sup>6</sup> Yapa' yeñoteñ nanac morrentenya Yompor tarro'mar ahuaťpa' ama es yocťape'ċhpeno ama't mamesha Yomporecop atťoch yequeshperrañ. Tarraña Yomporñaapa' e'ñe allempocmapa' ahuo't mueñan Puechemer Cristo aña patsro ñeñťcha' rromosets e'ñe yocop ñeñťey ama es coťape'ċhetso cohuen ama't mamesha Yomporecop.

<sup>7</sup> Ñehua, yapa' arromñaťeypa' yeñoteñ atarr torrapo' atťoch yerroma po'psheññecop, ama't añ acheñrecop ñeñť atarr cohuen. Tarraña er-rotenopa' ama tama torrapahuoye' yenteno o'ch yerroma añ acheñrecop ñeñť atarr amueraña.

<sup>8</sup> Tarraña yapa' ama't allempo ora yeťate'tyen sosya'tsañpa' e'ñe allempocmaña Cristopa' ahuo't rroma yocop. Atťoña Yomporpa' eñotaterrey yapa' nanac morrentenya.

<sup>9</sup> Ñeñťo'marña te'pa' e'ñe pocte' enteney Yompor tarro'mar Cristopa' ahuo't rroma yocop. Elloña atťoťña a'queshťatey alloċhñapa' amach a'coñċatareťeye ama't errponaña.

<sup>10</sup> Ama't allempo ora ye'moñe'teñ Yomporpa' Puechemerña po'rromñoťpa' ahuo't e'ñe yamo'tstannerra epay Pompor. Elloña te'pa'

atto correna Cristopa' attoña yapa'cho'ña a'queshpaterreycha'.

<sup>11</sup> Elloña te'pa' e'ñe yocsheña Yompor tarro'mar Puechemer ñeñtara Yepartseshar Jesucristopa' ahuo't amo'tstaterrya e'ñe ña Pompor.

*Atto yamo'mte' Adánpa' ñapa' cha a'chencatey; Yamo'mte'ña Cristopa' ñaña ya'queshpaterre'*

<sup>12</sup> Ahuať puesheñarr yacma ñeñt pa'so'cheñ Adánpa' ahuo't orrtatan atpare'teñets aña patsro Yomporcop. Ñeñto'marña allempoteñ allohueney ñeñtey acheñeypa' e'ñe attecma yeñohua. Ñaña allempopa' ahuo't anare'tta attoch yo'chñaro'tpa' o'ch yerroma. Ñeñto'marña allohueney ñeñtey acheñeypa' o'patuaya rromueñets tarro'mar allohueneypa' ñeñta yeñot ñeñt atet pa' ñanom yamo'mte' Adán.

<sup>13</sup> Ñaña allempoteñ corre't Adán, acheñenesha' arr patsropa' ñeñta eñotet ñeñt atet atpare'tan Adán Yompor. Tarraña allempopa' ama eñalletena' ñoñets ñeñt atet anare't alloch a'coñchatare'tterret.

<sup>14</sup> Tarraña attera o'patenanet rromueñets e'ñe allempoteñ corre't Adán ñeñta attera ñaña tarrempohua allempo corre't ñaña Moisés ñeñt nahuet ñoñets. Ama't ama atpare'teññañeto Yompor po'ñoñ e'ñe atet atpare'te't Adán, tarraña attera o'patenanet rromueñets. (Ñeñto'mar yeñoteñ Adán po'chñaro'tpa' ahuo't anare'tta attoch o'patuaya allohueney rromueñets.) Ñeñtña yamo'mte' Adánpa' aña o'patatuaya ñeñt ama cohuenayaye, tarraña Yamo'mte'ña Cristopa'

allempo huapapa' ñapa' añña o'patatosya ñeñt' e'ñe cohuenare'.

15 Tarro'mar e'ñe patparñesharmorot' Adánpa' ama atteyaye ñerra'm ñeñt' atet atarr muerenya Cristo. Tarro'mar e'ñe puesheñarra po'chñarot' o'patya rromueñets allohueney pa'namen acheñey. Tarraña elloñapa' eñall po'psheñeñ, ñeñtara Jesucristo ñeñt' yemuererraya. Attoña Yomporpa' orrtatonay puemuerena yocop alloña nanac cohuen es apatuene y e'ñe atta allohueney pa'namen ñeñtey acheñey.

16 Ñaña ñeñt' atet muererrya Yompor, ñeñtpa' ama atteyaye ñerra'm ñeñt' atet o'patuaya ochñarets ama't e'ñe puesheñarroña. Tarro'mar ñeñt' atet pa Adán ama't parrochapa' ñeñtaña yo'patatuenaya coñcheñets. Tarraña ñeñt' atet a'queshpaterrey Yomporpa' ñeñtpa' atet pa. Ama't shonteñ yo'chñarpa' ñaña' e'ñech pocte' enteney e'ñe atta tarro'mar ñeñtpa' o' a'pocatuonay Cristo.

17 Ñaña atto e'ñe puesheñarroña po'chñarot' o'patenya rromueñets, tarraña elloña nanac muererrya Yompor attoña a'rroyerrnay Puechemer ñeñtara Jesucristo ñeñt' o' a'pocatuerrnay yo'chñar Yomporesho attochña yapa' corretsayach.

18 Ñeñto'marña yeñoteñ atto e'ñe puesheñarroña po'chñarot' ahuo't o'patatyet coñcheñets, attecma ñaña puesheñarr ñeñt' Jesucristopa' ahuo't pohua ñeñt' e'ñe cohuen, alloña a'pocaterrey, attochña yapa' corretsayach yocsheñeshocmañen tayoteñ errponohuañen.

19 Atto e'ñe puesheñarra ñeñt Adán ñeñt atpare'tene' Yompor, ñeñto'marña ñesharmorot Yomporñapa' e'ñe ochñafoche' entueney ama't shonte' pa'namena'ttsocmay ñeñtey acheñey. Tarraña puesheñarr ñeñt Cristo ñeñt e'ñe cohuen ame'ñenaya Yompor, ñeñtñapa' alloch e'ñe pocte' enteney Yompor, ama't shontey pa'namena'ttsocmay ñeñtey acheñey.

20 Ñaña allempo chap allempoch anaretta ñoñets ñeñtcha' eñotaterrahuet ñeñtcha' atet pet ñaña ñeñtcha' ama atet aḗapahuo elloña allempopa' ñetpa' o' eñoterret atarr atparñaatterret. Tarraña ama't atto nanac yatpare'tena elloña Yomporpa' nanac muererrya.

21 Attoña e'ñe yeḗatse'tyeñoñ ñeñt ama cohue-nayayepa' ahuo't anaretta rromueñets ñeñtcha' yo'patenaya ñeñtñapa' coñcheñets. Tarraña elloña Jesucristo ñeñt Yepartseshar yepen ahuo't orrtatonay atto Yomporpa' nanac muererrya attoña a'pocatuerrnay yo'chñar. Attochña yapa' corretsayach yocsheñeshocmañen tayoteñ errpono-huañen.

## 6

*Atto ñeñt toma'ntena allempo yapataretta Cristocop*

1 Te'pa' e'ñe yeñoteñ ama't atet yeḗatse'tyese't ñeñt ama cohuenayaye, Yomporpa' elloña nanac muererrya, atto peretna'huerrnay yo'chñar. Tarraña ama't atteñpa' amach yotaḗsa'tatsto "ñeñteḗña' o'ch allo'na yeḗatse'tyesnena ñeñt sosya'tsañ tarro'mar Yomporpa' nanquḗpa't

muerenana ñeñt̃ p̃atse'tyene' ñeñt̃ ama  
cohuenayaye ñaña ellopa' o'chcho' alla  
muererrya."

<sup>2</sup> Tarraña amach errotent̃ allo'na yeseno  
p̃atse'tyesnomue' ñeñt̃ ama cohuenayaye  
tarro'mar o' ya'ypo'ñerr yo'chñar allempoteñ o'  
yaguër Cristo.

<sup>3</sup> Ama't señoñeña ñeñt̃ toma'ntena allempo  
yapatare'tta Cristocop. Añ toma'ntena atto o'  
yeparrocmaterr epay Cristo, atet̃ ñerra'mrrate'  
cho yerromapreteña Cristo allohueney ñeñtey ap-  
atarettetsa e'ñe yame'ñeño't̃ Cristo Jesús.

<sup>4</sup> Allempo yapatarettapa' e'ñe atet̃ ñerra'mrrate'  
cho yerromapreteña Cristo ñaña atet̃ ñerra'm  
cho yepampapreteña Cristo. Allempoña  
Yomporpa' ahuo't tantaterran Puechemer e'ñe  
po'huamencot̃ ñeñt̃ atarr cohuen, yapa'cho'ña  
ñeñt̃ara po'huamencarot̃ña e'ñe cohuen o'  
etserrataterrnay yoc̃taṗña, ñeñt̃cha' atet̃  
yocrrena.

<sup>5</sup> Tarro'mar e'ñe yeparrocmateño't̃ epay Cristo o'  
yerromaprecha. (Attochña ya'ypo'ñerr ñeñt̃ ama  
cohuenaye' entapretenye Cristo.) Ñaña ñerra'm  
yerromapreteña Cristo yeño'teñ o' yetantapretera  
attochña yocrrerra e'ñe cohuen ñocop.

<sup>6</sup> Tarro'mar yeño'teñ ñeñtey acheñey ñeñt̃  
yeyochro'tsen ñeñt̃ yoc̃tape'chataye't̃ sosya'tsañ  
ahua't̃ ñeñt̃pa' o' a'mchechatare'tetuerra atet̃  
ñerra'mrrate' acorso'tam̃psare'tta epuet Cristo.  
Attochña o'huañcha' cotape'chatse'tatnenedy  
yo'chñarañeña. Amach allo'na taruasatnenedy  
yo'chñar.

7 Ñato' o'ch yetma'ntacha atet pena arromñañ. Ñehua, yapa' yeñoteñ ñerra'm esesha' rromatspa' amach errotenoñ allo'na cotape'chyesnenano sosya'tsañ. Yapa'cho'ña atetcha' yentena ñerra'mrrate' cho yerromuen, amach errotenoñ allo'na yotape'chyesneno ñeññ sosya'tsañ enten Yompor.

8 Ñaña atto o' yerromaprecha Cristo, yapa' yeñoteñ ñaña e'ñe yeparrocmateñoñ Cristopa' alloña corretsayach, atet pena ñapa' e'ñe corretsa.

9 Tarro'mar yapa' yeñoteñ Cristopa' o' tanterra po'rromñoñ, amach alla rromuerre'te. Amach errotenoñ alla o'patere'te rromueñets.

10 Tarro'mar ñapa' atto rroma yo'chñarecoppa' ñeññpa' e'ñe parrocha rroma ama't allohuena-cop. Ñaña atto correna te' ñeññpa' e'ñe ora Pom-porecpa.

11 Yapa'cho'ña attecmuepa'ch yentena yamña yañeña. E'ñe yerromapreteñoñ Cristo Jesús pa' o'ch ya'ypo'ñerr yo'chñar ñeñño'marña amach errotenoñ alla taruasaterryerro yo'chñar. Ñaña te'pa' e'ñe yeparrocmateñoñ Yepartseshar Cristopa' o'ch yocrraprecha e'ñe cohuen Yomporecop.

*Attoch amach semnatatsche so'chñar o'ch alla taruasaterrnaserr sa'rromñañechets*

12 Ñeñño'marña te'pa' o'ch notas, amach semnatatsche so'chñarpa' o'ch alla taruasaterrnaserr sa'rromñañechets. Allochñapa' amach allo'na sepatse'tyesneno ñeññ atet muenatse'tatyenes sechets.

13 Amach semnatatsche sechets o'ch aña torrena ñeññ ama cohuenaye' enteno Yompor. Añcha'ña o'ch saphuer Yompor sechets allochñapa' ñachña torratenaya añecop ñeññ e'ñe cohuen enten ña. Ñato' o'ch yetma'ntacha atet ñerra'mrrate' cho yerromuen tarraña te'pa' o'ch alla yocrrerra cohuen Yomporecop.

14 Tarro'mar te'pa' amach errotentō allo'na taruasatnenye yo'chñar, tarro'mar te'pa' añ yeyemtena Yompor atto muerenyapa' ahuo't a'pocatonay yo'chñar. Ama añeye' yeyemteno ñoñets ñeññ atet anaret ñeññcha' atet yeṑohua esheccha' cohuen enteney Yompor.

15 Te'pa' yeñoteñ ama añeye' yeyemteno ñoñets ñeññ atet anaret. Añña yeyemtena Yompor puemuereño e'ñe yenpueney. Tarraña ama't atteñpa' ama pocteyaye o'ch allo'na yesen ṑatse'tyerrayerr ñeññ ama cohuenaye' enteno Yompor ama't mamesha.

16 Ñato' o'ch yetma'ntacha atet. Ñehua, yapa' yeñoteñ ñerra'm esesha' yemnen ñeññcha' yetaruasatene' añe patsro, ñeññpa' po'ñoch ñeññcha' yepatronar yepen, ñaña e'ñech pauner yentatena attochña ñeññach yame'ñena ñeññ yepatronar yepen. Ñaña attecnoch yepena ñerra'm añ yemnen yo'chñarach yetaruasatene', tarraña ñerra'm añ yetaruasatene' yo'chñarpa' ñeññpa' tsa'taterryach rromueñtso ñeññtara coñcheñtso. Tarraña ñerra'm añ yame'ñena Yompor ñeññ atet oteneṑ po'ñoñoñ, ñeññpa' alloch yorrtatyen e'ñe cohuen ñeññ e'ñe atet muenen ña.

17 Ñaña sapa' ahuaṑpa' aña setaruasataye't



so'chñar, tarraña te'ñapa' e'ñe seyočhrocmañen o' same'ñera ora ñeñt atet pena Yompor pa'poteñ ñeñtara ñeñt serrpare'tatasete't. Ñeñto'marña te'pa' napa' atarr nocshena, atarr neparasyoso'teñ Yompor socop.

18 Ñaña te'pa' o'huañcha' taruasaterrerr so'chñar. Añcha'ña setaruasaterre' Yompor erra'tsente' muenen ña.

19 Ñehua, Yompor pocta'ño'tpa' atet netma'ntatensa atto yocrrena acheñey arr patsro allochñapa' cohuencha' çhaponasa seyočhro Yompor pocta'ña. Ñeñt notenes po'ñoçhpa' ñeñt'pa' atet sepe't ahuat e'ñe pocte' sente't e'ñe ora sechtsohuen allo'na sete't patse'tnomue' sosya'tsañ ñeñt ama cohuenaye' enteno Yompor. Te'pa'çho'ña attecmuepa'ch e'ñe pocte' senteñ ora sechtsohuen o'ch sepomuerra Yomporcop, allochñapa' attoch sa'cohuentataretterra e'ñe cohuen Partsocop ñeñt e'ñe atet muenen ña.

20 Ñehua, ahuat allempo aña setaruasataye't so'chñarpa' ama añeye' soctape'che'te ñeñt e'ñe cohuen enten Yompor.

21 Tarraña ñeñt atet sepatse'tyese't sosya'tsañ ahuat'pa' ama es sherbase'te ama't mamesha, ñeñtara ama't te'pa' pencna'ntatenes. Yapa' yeñoteñ ñeñt'pa' allach tsa'taterryañ rromueñtso, ñeñtara coñcheñtso.

22 Tarraña te'pa' o'huañcha' alla taruasaterryerr yo'chñar. Añcha'ña yetorratene' Yompor po'taruas attoch yesherbeñ. Allochñapa' ñach yetsa'tenaya alloch ya'cohuentataretterra e'ñe cohuen ñocop aña patsro. Allochñapa' attochña aphuerrey

allochña yapa' corretsayach yocsheñeshocmañen tayoteñ errponañohuen.

<sup>23</sup> Tarro'mar yo'chñarpa' allach tsa'taterrya rromueñtso, ñeñtara coñcheñtso. Tarraña e'ñe yeparrocmateñoť epay Yepartseshar Cristo Jesúsapa' Yomporñapa' aphuerreycha' e'ñe atta allochña yapa' corretsayach yocsheñeshocmañen tayoteñ errponañohuen.

## 7

*Atto o'huañ amcha'nochtana'tenya añ ñoñets ñeñť atet anaret ahuať Moiséseshoť*

<sup>1</sup> Te'pa' o'ch masheñeshacha' ñaña nochaneshacha' netma'ntatasa po'poñ cotapñats. Ñehua, sapa' o' e'ñe señoťueñ atet pena ñoñets ñeñť atet anaret arr patsro ñeñťcha' atet yepena. Sapa' señoťen añ ñoñetspa' sherben tarremphuach allempo yocrrena añe patsro. Tarraña ñerra'm esempo yerromapa' añ ñoñetspa' amach erroťenot allo'na yame'ña'neño. O'huañcha' yame'ñeña.

<sup>2-3</sup> Atet ñerra'mrrate' ñeñť oteneť paterr ñoñets ñeñť atet anaret. Ñeñťpa' atet oteneť: Coyanasha' arrollare'tañpa' amach satstano puerrollar allempo correna añe patsro. Ñaña ñerra'm allempo correna puerrollar, ñerra'm o'ch yorer po'psheñeñ ñeñťcha' puerrollar perrpa' ñeñťpa' ama pocteyaye tarro'mar ñeñťpa' o'chña'tampeñets enteñ Yompor. Tarraña ñerra'm esemepoch rromapes puerrollarpa' allempoñapa' o'huañcha' ame'ñatacha' añ ñoñets ñeñť atet anaret puerrollarecop. Ñaña ñerra'm allempo yorer po'psheñeñ ñeñťcha' puerrollar perrpa' allempo

ñeñt'pa' e'ñe pocte' tarro'mar allempo, ñeñt'pa' ama o'chña'tampeñtsoye' enteñe Yompor.

4 Ñeñto'marña o'ch masheñnesha ñaña nočhanesha notas, yapa'cho'ña o'huañcha' añcha'noçhtana'tenya añ ñoñets ñeñt' atet anaret' ahuat Moiséseshoñ, tarro'mar ñeñtey o' yame'ñerrapa' o' yerromapretera Cristo. Ñeñto'marña te'pa' e'ñe pocte' o'ch yo'patera po'psheñeñ. Ñaña ñeñt' o' yo'pattera te', ñeñt'pa' Cristo ñeñtara ñeñt' tanterrtsa rromot. Allochñapa' attoch yorrtatyen ñeñt' e'ñe cohuen atet muenen Yompor.

5 Tarro'mar ahuat allempo e'ñe yañeña yocpañña ora yoc'tenpa' ama't yeñoteneñ añ ñoñets ñeñt' atet anaret'pa' attera muenateney o'ch allo'na taru-asatneney yo'chñar. Attoña allach chapaterryeñ rromueñtso attoch e'ñe yechenca'huerrañ.

6 Tarraña te'pa' e'ñe yerromapreteñoñ Cristo añ ñoñets ñeñt' atet anaret'pa' o'huañ añcha'noçhtana'tenya atet ñerra'm ahuat. Ñeñto'marña te'pa' e'ñe cohuen yocrrena Yomporcop. Te'pa' ama añecpayaye ñeñt' atet yepe't ahuat attoch e'ñe ya'mueroçhtame'teñoñ yetsoatuañ ñeñt' atet otye't ñoñets ñeñt' atet anaret'. Añecopña yocrrena e'ñe cohuen Yomporcop tarro'mar te' Parets Puecamquëñpa' o' etserrataterrnay yocpañña.

*Atto yo'chñarpa' atarr mopa'teney; amach muenatenye o'ch atet yepohua ñeñt' atet oteney ñoñets ñeñt' atet anaret'*

7 Ñehua, ñato' sapa' çhate' sotenapañ napa' noteneste' Yompor po'ñoñ ñeñt' atet anaret'pa'

ñeñt̃pa' amate' cohuenayaye. Tarraña ñeñt̃pa' ama atteye' notenso ama't mamesha. Ateť napa' ñerra'm ama eñallñeña añ ñoñets ñeñt̃ atet anareť, napa' amate' ĉhaponañeña neyoĉhro ñeñt̃ ama pocteye' enteno Yompor. Ateť ñerra'm ama eñallñeña añ ñoñets ñeñt̃ yotene' "amach yeye'ĉhapretanna'tatsto", napa' amate' ĉhaponañeña neyoĉhro ñeñt̃ ama pocteye' enteno Yompor ñerra'm esempo es yeye'ĉhapretannena.

8 Tarraña allempo ĉhapona neyoĉhro po'ñoĉh atet oteney ñoñets ñeñt̃ atet anareť ama es aye'ĉhapretanna'tpahuo, no'ĉhñar ñeñt̃ neyoĉhro'tsenpa' elloña nanaccha' es ye'ĉhatse'tatyenen. Ñerra'm ama neñotenñe añ ñoñets ñeñt̃ yotene' ama es aye'ĉhapretanna'tpahuo, ñerra'mañpa' amate' neñotenñe ñeñt̃ atet neye'ĉhapreteña po'psheñeñ ñeñt̃pa' ñeñt̃ña po'ñoĉh no'ĉhñar entapretenen Yompor.

9 Ahuat napa' allempo ama neñotena' ñoñets ñeñt̃ atet anareť, nañapa' nanac cosheñtso'tsennoñ allempo. Tarraña allempoña neñoter ñeñt̃ atet oteney ñeñt̃cha' atet yeĉa cohuen ñaña ñeñt̃ ama atet aĉpahuopa' allempoteñña napa' neñotena po'ñoĉhpa' shonte' no'ĉhñar ñeñt̃ neyoĉhro'tsen. Allempoteñña napa' atarr nellquerra nanac. Neñoteñ aña no'patenaya rromueñets ñeñt̃ara coñcheñets.

10 Ñaña añ ñeñt̃ara ñoñets ñeñt̃ atet anareť allo'ch yocrrenañ e'ñe cohuenpa' tarraña arepa't atteyaye, ñaña no'ĉhñar allo natpare'ten ñoñets ñeñt̃ atet anareť ñeñt̃ach nanmayeñ rromueñtso.

11-12 Tarro'mar allempoteñ neñoterr añ ñoñets ñeñt atet anaretpa' no'chñar ñeñt neyoçhro'tsenpa' elloña nanac cotape'chatse'tatenen sosey. Ama't nanac cohueney Parets po'ñoñ ñeñt atet anareteñ, ñaña atet oteneý Parets ñeñtcha' atet yeþa' cohuen, ñaña ñeñtcha' ama atet aþapahuoyaye, ñeñtpa' e'ñe cohuen, poctey. Tarraña na no'chñarpa' ama muenatenno o'ch cohuen es neþa', ñeñtpa' attepa't sheca'ne't. Napa' ama erro't nepeno, neñoteñ aña no'patenaya rromueñets ñeñtara coñcheñets.

13 Te'ña sapa' çate' sotenapañ añ ñoñets ñeñt e'ñe otets cohuenpa' ñeñtapa'tña yo'patatenaya rromueñets. Tarraña ñeñtpa' ama atteyaye. Añña ñeñt yo'patatenaya rromueñets, ñeñtpa' yo'chñar. Ñaña Yompor po'ñoñ ñeñt atet anare't ñeñt e'ñe cohuenpa' ñeñtña o' a'poterrnay yo'chñar. Attochña yeñoterr yo'chñarpa' nanac sosey entapreteneý Yompor.

*Atto eñall epa ñeñt huomenc yepene' yeyoçhro*

14 Yapa' yeñoteñ añ ñoñets ñeñt atet anaretpa' Partsesho't e'ñe cohuen anareteñ, tarraña atet ñerra'm napa' arromña'oto'a atet nepena, çocmach neþatse'tyen ñeñt ama cohuenaye' enteno Yompor. E'ñe atet nepena ñerra'mrrate' aña netaruasatene' no'chñar.

15 Ama neñoteñe eso'marte'ña atet nepena, tarro'mar ama't ñeñtcha' atet o' nepohuapa' ama't napa' amach e'ñe pocteye' nenteñe. Tarro'mar ama't nemneñeñ añte' atet nepohua ñeñt e'ñe cohuen enten Yompor; tarraña arepa'tña atteye'

nepeno. Añepa't atet nepen ñeñt ama nemnenñe, ñeñt po'ñoçh ama cohuenaye' enteno Yompor.

16 Ñaña esempo o'ch neṗohua ñeñt ama cohuenayaye, ñeñt ama't napa' ama nemnenñe, nañapa' neñoteñ attoña o' natpare'tua ñoñets ñeñt atet anaret ñeñt e'ñe cohuen.

17 Ñeñto'marña neñoteñ ñerra'm esempo o' atet neṗohua ñeñt ama't napa' netsena'ten, ñeñtpa' neñoteñ ama e'ñe naye' atet petso. Añña atet neṗatene' no'chñar ñeñt allo'tsenara neyoçhro.

18 Napa' neñotena e'ñe atta eñalletñan, neyoçhroña' ama eñalle attoch cohuen enten Yompor, ama't coñe'ta. Ama't nemneñeñ o'ch atet neṗañ ñeñt e'ñe cohuen enten Yompor, tarraña ama erroṭ nepeñe atet ṗatsa ñeñt atet cohuentetsa.

19 Ñeñt atet nepenapa' ama't napa' ama pocteye' nenteñe. Tarro'mar ama't nemneñeñ o'te' atet neṗohua ñeñt e'ñe cohuen enten Yompor, tarraña arepa'tña atteye' nepeno. Añach atet nepena ñeñt ama nemnenñe ñeñt po'ñoçhpa' ama cohuenaye' enteno Yompor.

20 Ñeñto'marña neñoteñ, ñerra'm esempo o' atet neṗohua ñeñt ama't napa' ama nemnenñe, ñeñtpa' neñoteñ ama e'ñe naye' atet petso. Añña atet neṗatene' no'chñar ñeñt allo'tsenara neyoçhro.

21 Ñeñto'marña te'pa' neñotena ñerra'm esempo yemneñeñ o'te' atet yeṗañ ñeñt e'ñe cohuen enten Yompor, tarraña yo'chñar ñeñt yeyoçhro'tsenpa' çhocmach coṭape'chateney ñeñt ama cohuenaye' enteno Yompor.

22 Tarraña atto Yompor o' coṭape'chaterrey

cohuen yeyoçhropa' ñeñt'pa' alloch e'ñe yocsheññaña po'ñoñ.

<sup>23</sup> Tarraña ama't atet'pa' yapa' yeñotena eñall po'poñ ñeñt' huomenc yepene' yeyoçhro ñeñt' çhocmach e'moñe'tenan ñeñt' atet' yoctape'chen cohuen Yomporecop. Ñaña yo'chñar ñeñt' huomenc yepene' yeyoçhropa' ñeñt'ña nanac mopa'tene' yechets.

<sup>24</sup> ¡Ee-say! Nanac llequëñtso'tseney ya. Ee-sha'huachca' ya'huañañperre'te' yo'chñar ñeñt' nanac yemueroçhtatene' ñeñt'cha' yanerre'te' rro-mueñtso.

<sup>25</sup> Nanac neparasyoso'teñ Yompör tarro'mar neñoteññañ Puechemer ñeñt' Yepartseshar Jesucristo ñepa'tña e'ñe ya'huañañperre' yo'chñar. Ñeñto'marña e'ñe yeyoçhropa' yemneñeñ o'ch yoctape'cherrñañeñ Yompör po'ñoñ, tarraña yo'chñarña'pa' ñeñt'ñaña çhocmach yetaruasatene' e'ñe yechtso.

## 8

*Atto Parets Puecamquëñpa' ñeñt'ña huomenc yepene'yeyoçhro*

<sup>1</sup> Ñeñto'marña te'pa' yeñoteñ amach a'coñchatarefeye ama't puesheñarroñeya ñeñtey o' yeparrocmaterra Cristo Jesús. Ñehua, ñeñtey o' yeparrocmaterra Cristo, ñeñt'pa' añ, atto o' cotape'chatterrey Parets Puecamquëñ, amaña añeye' yoctape'chatenaye yo'chñar ñeñt' yeyoçhro'tsen.

<sup>2</sup> Tarro'mar te'pa' atet' ñerra'm napa' e'ñe neparrocmateñoñ Cristopa' añña Parets

Puecamquẽña' ñeñña huomenc nepene' neyoçhro, allochña napa' corretsanach tayoteñ ama't ñaña errponohuañen. Attoña o' a'huañañperren atto no'chñarpa' ñeñña huomenc nepaye't neyoçhro, ñeñtcha' nanmayeñ rromueñtso, ñeñtara coñcheñets.

<sup>3</sup> Ñehua, añ ñoñets ñeñt atet anaret ñeñtcha' yetsotateneña' amach errotenot a'qeshpaterrye, tarro'mar ya arromñañey yo'chñarpa' ama muenatenye o'ch atet yeçohua ora ñeñt atet oteney añ ñoñets. Tarro'mar añ ñoñetspa' ama eñalle attoch huomenc ñonay yeyoçher esheccha' yetsotue ora allpon ñeñt atet oteney ñeñtcha' atet yeçohueneñ. Tarraña atto Yomporpa' ahuo't a'pocatuonay yo'chñar ñeñtapa' atet pa. Napa' ahuo't mueñonay e'ñe ña Puechemer ñeñtcha' eñalletostsa arr patsro e'ñe atet ñerra'm ya ñeñtey arromñañey, ñeñtey ochñañey. Allochñapa' ñach rromosets yo'chñarecop; allochñapa' attoch tsa'tuonaya yo'chñar. Attochña a'huañañperrey atto yo'chñara ñeñña huomenc yepene' yeyoçhro.

<sup>4</sup> Atet o' ñonay Yompor attoch te' yapa' o'ch atet yepa cohuen ñeñt atet oteney Yompor po'ñoñ, allohueney ñeñtey atet petsa atet coñape'chateney Parets Puecamquẽñ, ñeñtey o'huañ atet yeñatse'tyesa ñeñt atet coñape'chatse'tateney yo'chñar ñeñt yeyoçhro'tsen.

<sup>5</sup> Tarro'mar ñeñt atet petsa ñeñt atet coñape'chatenanet sosya'tsañ ñeñt pueyoçhro'tsenetpa' añachña e'nenet ñeñt atet muenatse'tatenanet po'chets. Tarraña ñeñt atet petsa ñeñt atet coñape'chatenanet Parets



Puecamquëñpa' añcha'ña e'mñnotenet ñeñt atet muenatenanet Parets Puecamquëñ.

6 Tarro'mar ñerra'm añach ye'nen ñeñt atet muenatse'tateney yechetspa' ñeñtpa' ñeñtcha'ña yanerre' rromueñtso ñeñtara coñcheñtso. Tarraña ñerra'm añ ye'mñnoten ñeñt atet cotape'chateney Parets Puecamquëñpa' ñeñtpa' ñeñtcha'ña allochña yapa' corretsayach e'ñe cohuen yocsheñeshocmañen.

*Atto ñerra'm añach ye'nen ñeñt muenatse'tateney yechetspa' amach errotenot yame'ñeroña Yompor*

7-8 Tarro'mar ñerra'm añach ye'nen ñeñt atet muenatse'tateney yechetspa' ñeñtpa' atet yepena ñerra'mrrate' cha ye'moñe'teñ Yompor, ñeñto'marña chach yatpare'teññañ po'ñoñ. Amach errotenot yame'ñeroña Yompor ñerra'm añach ye'nen ñeñt atet muenatse'tateney yechets. Ñaña ñerra'm attach yepenapa' amach errotenot yocshacheña Yompor.

9 Tarraña sapa' ama añeye' soctape'chatenaye sechets; añña soctape'chatene' Parets Puecamquëñ ñerra'm po'ñoçh Puecamquëñpa' o' yeçherra seyochro. Tarraña ñerra'm eseshas ama echenaye Cristo Puecamquëñ seyochropa' ñeñtesña po'ñoçhpa' ama puechemereyayso Yompor.

10 Ñehua, ya arromñañteypa' chocmach yerroma arr patsro ochñartso'marecop. Tarraña ñerra'm Cristo yeçhena yeyochro yecamquëño'tpa' chocmach yocrrena tarro'mar Yomporpa' e'ñe pocte' enteney.

11 Yapa' yeñoteñ Yomporpa' ahuo't tantaterran Puechemer ñeñt' Cristo Jesús po'rromñoť. Ñaña ñerra'm Yompor Puecamquëñ yeçhena ya yeyoçhro, ama't arromñaťeypa' yapa'çho'ña tantatuerreycha' yerromñoť. Parets Puecamquëñoťña'pa' yocrra'huerrach, ñeñt'ara Puecamquëñ ñeñt' yeçhetsa te' yeyoçhro.

12 Ñeñto'marña masheñnesha ñaña noçhanesha, te'pa' añ e'ñe poctetsa o'ch e'ñe atet yepena ñeñt' atet cotape'chateney Parets Puecamquëñ, ama pocteyaye o'ch atet yepena ñeñt' atet cotape'chateney yechets.

13 Tarro'mar ñerra'm allo'na yocrra'nena ñeñt' atet cotape'chateney yechetspa' ñerra'm yerromapa' yeçhenca'huerrach yo'chñaroť, țarraña ñerra'm Parets Puecamquëñoť o'ch ya'ypo'ñerr ñeñt' atet p'atse'tateney yechetspa' yañapa' corretsayach.

*Atto ñeñtey e'mñotene' ñeñt' atet cotape'chateney Parets Puecamquëñ, ñeñteyña'pa' o' po'ñoçh puechemer perrey Yompor*

14 Tarro'mar allohueney ñeñtey e'mñotene' ñeñt' atet cotape'chateney Parets Puecamquëñ, ñeñteyña'pa' o' po'ñoçh puechemer perrey Yompor.

15 Ñeñto'marña amach alla yeñcha'terrero atet ñerra'mrrate' ñeñt' ñañrets, atarrcha' mecha'tenan pamo'mte'. Tarro'mar yapa' allempoteñ o' yaguërrñañ Yompor Puecamquëñ yañapa' o' puechemer perrey po'ñoçh. Ñeñto'marña

amach yem̄cha'nañote'ye' yema'yocheñoṭpa' o'ch yeçhore'ch, o'ch yoch: "Apa."

16 Tarro'mar ñeñtara Parets Puecamquẽñ ñeñña yeñotatene' yeyoçhro po'ñoçhpa' o' puechemer perrey Yompor.

17 Ñaña yapa' yeñoteñ atto o' puechemer perrey Yomporpa' yapa'çho'ña yagapapretercha' Cristo ora ñeññ allpon o'patatenya Yompor. Ñerra'm çho yemuerochta Cristo'marecop te', atet pe't ña atarr muerochte't ahuať añe patsro, esempohuañen yapa'çho'ña yecohuentapreterach.

*Atto ama't yemuerochetuanena añe patsro, ñeñtpa' ama esoye'yenteñe*

18 Ama't yemuerochetuanena añe patsro, ñeñtpa' ama esoye' nenteñe. Tarro'mar neñoteñ esempohuañenpa' ellochña nanac yecohuentapretera Cristo.

19 Ama't ora allpon ñeññ yentyen arr patsro ñeññ yeçhcatua Yomporpa' ñetpa'çho'ña elloña atarr cohueñet esempohuañencha' Yomporpa' orrtatuerr-eycha' ñeñtey o' puechemerasha' perrey, attoch allempochña o'ch yecohuentapretera Cristo.

20 Tarro'mar ahuať allempo atpare'te't Adán, Yomporña'pa' ahuo't a'huañatan atto atarr sherbañ nanac ñeññ ora allpon pueyeçhcatar. Allempoña'pa' o'huañ tama sherba'. Tarraña pueyeçhcatarpa' ama erroť po, tarro'mar atet muenen Yompor. Tarraña ama't atet ñanetaña'pa' elloña te'pa' çhocma cohueñet attoch esempohuañen Yomporpa' o'ch alla a'cohuentatuerranet.

21 Tarro'mar ora allpon ñeñt̃ yentyen añe patsropa' atet̃ anaretet̃ ñamet̃ chocmach mellasha'tuet, allempoñapa' o'huañcha' sherbet. Tarraña ñerra'm esempohuañencha', ñeñtey o' puechemer perrey Yomp̃or o'ch yecohuentapretera Cristo, ñaña allempoña ora allpon Yomp̃or pueyeçhcatarpa' ñetpa'cho'ña o'ch alla a'cohuentataretetuerret̃ ñamet̃.

22 Yapa' yeñoteñ ora allpon ñeñt̃ yentyen añe patsropa' chocma muerochetyenet ama't teme'ttsen, tarro'mar ama a'cohuentatuare'tterra'. Nanac llecanrroreyenet atet̃ ñerra'mrrate' coyanesha' ñerra'm o' chap allempoch cheyore'ten nanaccha' atsotenana pue'mar. Nanac llequëñtso'tsen tarrempohuach allempoch eñalletatuan pue'mar. Allempoñapa' nanaccha' cosheñtso'tsen, tarro'mar o' eñalletatuan pue'maretoll. Atet̃cha' perraña ñaña Yomp̃or pueyeçhcatareçhno, nanaccha' cosha'rretterret̃ esempohuañencha' allempoch a'cohuentataretetuerret̃.

23 Ama ñap̃tayaya Yomp̃or pueyeçhcatar muerochtetso. Yapa'cho'ña chocma yemuerochetyena arr patsro, amach e'ñeye' yeñmateno yeyoçhro. Tarraña ama't atetpa' o' yechen Parets Puecamquëñ ñeñt̃ yechetsa yeyoçhro ñeñt̃ ñanom apueney Yomp̃or, allot̃ñaapa' orameñ ñaña ñeñt̃ o'patatenya pa'namen. Ñeñto'marña yeñoteñ esempohuañenpa' aphuerreycha' ora allpon ñeñt̃ o'patatenya. Ñeñto'marña yecueñ esempohuañen Yomp̃orpa' o'ch orrtatuerrnay ñaña atfo yapa' o' puechemerasha' perrey. Allempoña ya yechetspa' a'po'poñetuerrnaycha' atfochña yecohuentapretera

Cristo.

<sup>24</sup> Allempoteñ o' yaguërrñañ Yompor Puechemer ñeñt̃ Cristo yapa' yeyemteññaña ñeñt̃ o'patatenya ñeñt̃cha' atet perrnay esempohuañen. Ñeñto'marña allempoteñ o' ya'queshpataretterra chocmach yecueñ esempohuañen allempoch a'po'poñetuerrnay yechets attochña yecohuentapretera Cristo. Po'ñoçhpa' ama a'po'poñetuerrnaya' yechets, ñeñto'marña teme'ttsen yecueñ. Ñerra'm o' a'po'poñetuerrnayeñ yechetspa' allempoñapa' amate' palltenañe o'ch yeyemteññaña ñeñt̃ atet muenateney ña.

<sup>25</sup> Tarraña ñerra'm chocma yeyemteña Yompor ñeñt̃ atet otene yeyoteñ atetcha'ña perrnay esempohuañen. Ñehua, ama't ama orrtena', te'pa' yeyemteñoñ ñapa' e'ñepa'chña yocsheñeshocmañen yecueñ. Amachña cha yemuenme'chatsche.

*Atto enamuennay Parets Puecamquëñ Yomporeshot̃*

<sup>26</sup> Ñaña attecma Yompor Puecamquëñ ñach yeyenpuene' ñerra'm esempo ama erroñ es apen yenteno. Ñehua, atet ñerra'mrrate' allempo yelquëñesha' yema'yochena ñato' ama yeyoteñe escha'ña yenamña Yompor ñeñt̃ e'ñe pocte' enten ña. Allempoña Parets Puecamquëñpa' ñachña enamats yocop e'ñe puellcapreteñoñey ya, e'ñech pue'narña'teñoñ, amach çhoye' eñoreno attoña enamatenay Yompor yocop.

<sup>27</sup> Tarraña Yomporpa' cohuennay allohueny ñeñt̃ atet yoc̃tape'chen yeyoçhro, ñeñto'marña

ñapa' eñoteñ ñeñt atet enamuennay Puecamquëñ, tarro'mar Puecamquëñpa' añach enamuennay ñeñt e'ñe pocte' enten Yompor yocop ñeñtey o' pueyochresha' perrey Parets.

*Ñeñtey e'ñe eñotuaye't ahuat Yomporpa' ñapa' atarr coçhnesha' o'patatenya*

28 Ñaña ama't es yehuapoya, yapa' yeñoteñ Yomporpa' ñach a'pocstatene' yocop, allohueney ñeñtey morrentenaya ña, ñeñtey acraretey o'ch atet yepeññañ ñeñt atet muenen ña.

29 Tarro'mar allohueney ñeñtey e'ñe eñotuaye't Yompor ahuat, ñeñteycha' ame'ñerraya esempo, ñañaapa' cotape'che't ahuat yocop ñeñtcha' atet muenatey, allochñapa' yach cotape'cherrets cohuen attochña yeyeçhquërra e'ñe ora atet ñerra'm Puechemer ñeñt Cristotets. Allochñapa' allohueney yepo'narcha' yepañ Cristo ama't shontey ñeñtey ame'ñetsa.

30 Ñehua, allohuen ñeñt atet cotape'che't Yompor yocop ahuatpa' allempoña ahuo't çhap allempoch çhore'terrey o'ch yame'ñera. Allochña ñeñtey açhore'tareteypa' ñañaapa' oten yocop e'ño' pocte' enteney e'ñe yeyemteño't Cristo. Allochñapa' allohueney ñeñtey e'ñe pocte' enteney, Yomporñapa' oten yocop yecohuentapretero'ch Cristo esempohuañen.

31 Ñeñto'mar te'pa' o'ch notas, Yomporpa' atarr cohuen morrentenya. Ñaña yapa' yeñoteñ atto nanac morrentenya Yomporpa' ama't eseshapa' amach erro'teno't a'huañañperetoña atto morrentenya.

32 E'ñe puemorrenteño'tey ya ama't e'ñe ña Puechemerpa' ama mopa'tam'pesye, elloña a'rroyonay Puechemer ñach rromosets yocop allohuenacpay. Atto atarr morrentenya attoña yapa' yeñoteñ elloña attecma esocmañencha' apa'yeney e'ñe allempoteñ apuerrey ñaña Puechemer Cristo.

33 Ñeñtey acerr Yompor ñeñteycha' puechemer perr, ama't esesha' muenenayen o'ch otteñe'chenyetañ, tarraña ñeñtpa' ama esoye' yenteñe yocop, tarro'mar Yomporpa' oten e'ño' pocte' enteney. Amach erro'tenot esesha' yetsa'taterrayo yo'chñar,

34 tarro'mar Cristo Jesús'pa' ña rromats yo'chñarecop, elloña ñaña tanterrtsa po'rromño't, ñaña te'pa' ña partsotapretenaya Pompor po'cohuenrot; alloteñña ñapa' eñorena yocop Pomprosho attoch es e'ñe a'pocstatennay.

35 Atarr nanac morrentenya Cristo. Ama't eseshapa' amach erro'tenot puerratañpesyetoña atto nanac morrentenya Cristo. Ñaña ama't erro'teno'tsenya amach huañerroña atto nanac morrentenya Cristo. Ama'tcha' añ ye'chapoya muerochteñets, ama'tcha' nanac llequëntso'tseney, ama'tcha' ñerra'm esempo pue'moñe'teño'tetay cotare'tenyet, ama'tcha' ñerra'm esempo yepallta'yena ñeñtcha' yerren, ama'tcha' ñerra'm esempo yepallta'yena ñeñtcha' yechorrena, ama't ñerra'm esempo añcha'no'cheno'tseney, ama'tcha' ñaña allempoch muetsayet, amach erro'tenot puerratañpesyetoña atto nanac morrentenya

Cristo.

<sup>36</sup> Atetcha' perryetña ya esempo e'ñe atet anaret Yompor po'ñoño ñeñt' aquellca'huaret ahuatoteñ. All anuaret ñeñt' atto puesheñarr ñeñt' ame'ñatse'tpa' otane't Yompor, ñeñt'pa' e'ñe atet ot:

E'ñe yame'ñeñoteḡ papa' yellapene'tcha' e'ñe autsa yemtsanate' ñeñt' ye'moñe'tene'.

Ñetpa' e'ñe amtsen entenyet e'ñe atet ñerra'm carrnero ñeñt' chocmach aneñet allcha' muetsanachet.

<sup>37</sup> Ama't yemuerochetuahuapa' elloña nanaccha' ahuaencat perrey Cristo ñeñt' nanac amorrentña yenten.

<sup>38</sup> Ñeñto'marña napa' neñoteñ, ñeñtey ame'ñenaya Cristo Jesús ñeñt' Yepartseshar yepenpa' ama't erroteno'tsenya amach erroteno't huañerroña ñeñt' atto nanac morrentenya Yompor. Ama't allempoch yerroma, ama't allempo ñaña yocrenmeñpa' chocmachña morrentenya. Ama't Yompor po'mllañoñeñnaneschar ñeñt' huetsa pue'ntañotpa' amach erroteno't puerratañpesyetoña ñeñt' atto morrentenya. Ama't ora allpon ñeñt' añcha'noçhetyetsa, ama't ñaña ora allpon ñeñt' añcha'taretetyetsa arr patsropa' ñetpa'cho'ña amach erroteno't puerratañpesyetoña ñeñt' atto Yomporpa' nanac morrentenya. Ama't ñeñt'cha' yehuapoya te' ama't ñaña ñeñt'cha' yehuapoya tsapañone't, ñeñt'pa'cho'ña amach erroteno't a'huañamñpesyetoña atto Yomporpa' atarr morrentenya.

<sup>39</sup> Ama't errponenaparen yetuanena atarr eno, amapa' ñaña o'pono patso ama't ñaña oño o'pono,



allpa'cho'ña amach errotenoť yesa'nmoña atto Yomporpa' nanac morrentenya. Ama't ora allpon ñeñt'yečhcatua Yompor aña patsropa' ñetpa'cho'ña amach errotenoť a'huañañpesyetoña ñeñt' atto nanac morrentenya Yompor, allohueney ñeñtey ame'ñenaya Puechemer ñeñt' Cristo Jesús ñeñt' Yepartseshar yepen.

## 9

*Atto Pablopa' atarr llequënana pamo'tsna'tarnesha' ñeñt' israelnesha' ñeñt' acrañ Yompor ñeñt'cha' pueyochresha' pañ*

<sup>1</sup> Ñaña ñeñt'cha' notas te'pa' ñeñt'pa' e'ñe po'ñočh atet, ama čhoje' neshquënso, tarro'mar napa' o' name'ñera Cristo. Ñaña Parets Puecamquëñ ñeñt' yečhetsa neyočhro, ñeñt'ña e'ñe eñotenen ñeñt'cha' atet notas ñeñt'pa' e'ñe po'ñočh atet.

<sup>2-3</sup> Napa' atarr nanac nellquëña nemo'nasheñnesha' ñeñt'ara judionesha' tarro'mar ñetpa' shontetañpa' ama ame'ñeñeto Cristo. Ñeñt'ña nenen neyočhro atto atarr nellquënanet. Ñerra'm errotenoť na'queshpatanet o'te' na'queshpaterranetañ. Ama't pocte' nenteñeñ o'ch na'cmarettañ nañeña attoch nechenquërra allochñapa' amach nentere Cristo, ñerra'm atet neřapa' ñetpa' ñato' o'te' na'queshpaterranetañ. Tarraña ama't atet neřatstañpa' amach errotenoť na'queshpaterraneto.

<sup>4</sup> Ñaña namo'tsesha' judionesha' ñeñt'ara israelena'tarnesha' ñeñt' acrañ Yompor ahuať ñeñt'cha'

puechemerasha' p̄añ, ñaña ñetpa' chocma entoñetañe't Yompor po'partsoña ahuat. Ñaña ñet Yomporpa' chocma a'pocatanetañe't ahuat attoch chocmach a'natenanet. Ñaña ñetpa' apanetañe't Yompor po'ñoñ ahuat, ñeñña eñotatahuete't ñeñ atet pocte' enten Yompor. Ñaña ñeñtara judionesha' ñeñ eñotaye't attoch nanac e'ñe cochneshot sherbeñetañ Yompor pa'paclo. Ñaña ñeñtara judionesha' Yompor ahuatpa' ahuo't otanetañ ñeñtcha' atet apuerranet esempohuañen.

<sup>5</sup> Ñaña ñeñ ñanom yamo'mtayñeneshañ\* yepe't ñeñ nanac sherbaye't Yompor ahuatpa' ñetpa' ñeñtara judionesha' pamo'tsna'tarneshañ. Ñaña ama't judiona'tareshotpa' ahuo't eñalletosa Cristo arr patsro ñeñtara ñeñ nanac Partsoets ñeñ pomnaren pene' allohuen esocmañen. Ya'ye'chochtatoñepa'ch tayoteñ ama't errponohuañen. Ñeñtapa' attetepa'ch Nompore.

<sup>6</sup> Tarraña ama't allohuen judionesha'ña ama'tcha' ama ame'ñereto Cristopa' Yomporñapa' amach errotenot huañerroña po'ñoñ ñeñ atet otanete't ahuat; ñeñtapa' chocmach etsota ñeñ atet otanet, tarro'mar ñapa' ama puenesho po'ñoñ. Ñaña allohuen ñeñ israelena'tarpa' ama allohuenacmaye' Yomporena'tareyayeto.

<sup>7</sup> Ñaña ora allpon po'mrenña Abrahampa' ama allohuenacmaye' po'noch Abraham puechemer entapreteñe Yompor. "Aña e'ñe puechemer entapreteñ Yompor ñeñ Isaac po'mrenña", ñeñ atet

---

\* **9:5** Pablo otatse't yamo'mtayneshañ tarro'mar ñapa' judionesha'.

otan Yompor Abraham ahuat.

<sup>8</sup> Ñeñto'marña yeñoteñ allohuen Abraham po'ñreneña' ama allohuenacmaye' po'ñoçh puechemer penaneto Yompor. Añachña puechemer pen ñeñt yemtenaya Yompor ñeñt atet otenanet.

<sup>9</sup> Ñehua, yapa' yeñoteñ atet ahuat Yomporpa' otan Abraham ñeñtcha' aþ, ñeñtpa' atet ot: "Tsapat charo atet ñerra'm te' añempo, o'ch nohuerra allempoñapa' petapor Sarapa' cheyore'tcha' ñeñtpa' asheñorrcha' ñeñtcha' Isaacatats." Arrpa' allohua ñeñt atet Yomporpa' otan Abraham.

<sup>10-13</sup> Elloña te'pa' o'ch alla neyerpaterrser atto yatañ Isaacpa' ahuo't yoran Rebeca ñeñtcha' puetapor pa'. Ñaña allempo Rebecapa' totana Isaac puechemer ñeñt epuesha' Yomporñapa' otan Rebeca, atet och: "Ñeñtcha' eñalletatsa ñanom pechoyorpa' añcha' pomnaren pene' ñeñtcha' eñalletatsa chenta'." Arrpa' allohua ñeñt atet Yomporpa' otan Rebeca. Ñaña allempo ama eñalletena' puechoyoresha' Yomporñapa' ahuo't ye'choña paterr puechoyor ñeñt muenen ña, ama't allempopa' ama es yeçcateneta' ama't ñeñt cohuen enten Yompor amapa' ñeñt ama cohuenayaye. E'ñe atta ahuo't ye'chana puesheñarr ñeñt muenen ña; cheshatollpa' ama pueyeçcateñoñeye' cohuen ye'chyona Yompor, tarro'mar cheshatollesha'pa' ama es yeçcateneta' ama't coñe'ta. Attoña ahuo't etsota Yompor po'ñoñ ñeñt atet aquellca'huare't ahuatoteñ, ñeñtpa' atet oten Yompor: "Jacobpa'

atarr nemorrenteña, pa'mo'nasheñña Esaúpa' ama tama nemorrenteño." Atet þa attoch yeñooh Paretspa' ña acrañtetsa ñapueñ añecop ñeñt e'ñe ye'chena ña.

*Atto Yomporpa' e'ñe pocte' entan o'ch puechemer þan ñaña ñeñt ama judioneshayaye*

<sup>14</sup> Te'ña ñato' sapa' çate' sotenapañ ñeñt atet ote't Yompor, ñeñtpa' amate' pocteyaye. Tarraña o'ch notas ñeñtpa' e'ñe pocte' atet ote't Yompor.

<sup>15</sup> Tarro'mar yapa' yeñoteñ atet Yomporpa' otan ahuať Moisés, ñeñtpa' atet och: "Ñerra'm esesha' neye'cha na ñeñtcha'ña neyenpa'. Ñaña ñerra'm esesha' neye'cha na ñeñtcha'ña atarr nemorrentena."

<sup>16</sup> Ñeñto'marña yapa' yeñoteñ ñerra'm esesha' muenen Yompor ñeñtcha'ña a'natena, ñeñtpa' e'ñe pocte'. Ñeñtpa' ama añoteyaye ñeñt atet yemnen ya acheñey, ñaña ama ya'mueroçhtame'teñoña ye'chenyoña Yompor. E'ñechña puemuereñoña ye'chenana erra'tsen muenen ña.

<sup>17</sup> Ñaña yeñoteñ ñeñt atet Yomporpa' otan ahuať ñeñt añcha'tarettatset Egipto. Ñeñtpa' atet otan añcha'taret Faraón: "Na pene', ñeñteþ añcha'tarettetsa, attoch peshoch norrtat nehua-menc acheñeneshesho. Attochña ñetpa' o'ch ser-ppare'tyesonet erracmañen atto na ñeñten nanac ahuañencattetsa."

<sup>18</sup> Ñeñto'marña yapa' yeñoteñ ñerra'm esesha' muenen Yompor o'ch a'natanetpa' ñeñtcha'ña a'natena. Ñaña ñerra'm esesha' muenen Yompor

o'ch echartenet pueyočhreto, ñachña muenate-nahuet.

<sup>19</sup> Te'ña ñato' sapa' čhate' sotenapañ: "Ñerra'm Yompor ñach yemnatene' ñeñt e'ñe atet muenen ñapa', yapa' amach erroť yepe, ñeñto'marña amate' pocteyaye o'ch enteney yapa' amo' cohuenayaye, ñerra'm ña yemnatatene' o'ch es atet yeḑa." Ñato' sapa' attate' soctape'chatse'tyen seyočhro.

<sup>20-21</sup> Tarraña masheñneshacha' ñaña nočhaneshacha', o'ch notas, Yomporpa' ama asasare'tpahuoyaye. Ñato' o'ch netma'ntatasa atet: Ñato' esesha'pa' o'ch yečcatan coyemñ ñeñt patsrro'. Ñeñt e'ñe atet muenen ña, ñapa' ñeñtcha' atet yečcat. Ñato' o'ch yečcatan eprroga coyemñ, puerrogarrpa' atarrcha' cohuen, e'ñech cohuenoť sherbenan pamo'mte'. Alloťña'pa' ñeñt a'pchat patspa' o'ch alla yečcaterranerr po'prroguēñ puecoyemñ. Ñato' ñeñt'pa' amach tama cohuenaye' pe, tarro'mar ñeñt yečcate'pa' ama mueno o'ch orrtach acheñeneshesho. Tarraña coyem'pa' ñerra'm eñoreña'pa' amach sasare'tanoña pamo'mte', amach oche: "Eso'marte' peyečcaten atet, ama cohuenaye' peḑa'no." Tarro'mar ñerra'm pamo'mte' muenets atetcha' pan puecoyemñ, coyemñña'pa' amach erroť es ḑo. Ñeñto'marña yeñoteñ Yomporpa' ama't erroťen muena' o'ch atet ḑonay, ñeñt'pa' e'ñe pocte' ñocop, tarro'mar Parets añecoppa' ña otets ñapueť. Ñaña yapa' amach yesasare'che, tarro'mar Parets'pa' ama asasare'tpahuoyaye.

<sup>22</sup> Ama't atteña' elloña Yompor ahuatpa'

atarr ahuantane't atto nanac atpare'che't ñeñt  
o'pate't chenguëñets. Ñerra'm ña muenatseñ e'ñe  
pocteñ attoch tsa'taterranetañ e'ñe allempocma  
po'yorochenñot. Attochña entatanetañ  
po'huamenc tarraña ama atteye' ðaneto, atña  
ahuantanete't po'chñaret.

23 Allochñapa' attoch esempopa' chap o'ch  
orrtaterrnay allohueney po'cohuenña, ñeñtey  
o' muererrya yaña, ñeñtey ahua't Yomporpa'  
cotape'chonaye't yecohuentapretero'ch  
esempohuañen.

24 Ate't ñerra'm ya ñeñtey judioneshay, ama't  
ñaña ñeñt ama judioneshayaye, tarro'mar ama  
judioneshayaya ñapue't chore'tenoña Yompor  
ñeñtcha' ame'ñaya. Allohueneyña te'pa' o'  
chore'terrey o'ch e'ñe yame'ña'huera.

25 Ama't ate't ote'teña Yompor ahua't, allempo  
otan Oseas ñach serrpare'te' ñeñt ate't och Yompor,  
ñeñtpa' ate't ot Yompor:

Ama't ñeñt ama nechemereyaye te'pa'  
tsapatonetñapa' e'ñech nechemer  
neþhuerranet. Ama't po'poñ acheñ ñeñt  
ama nemorrenteno te'pa' tsapatonetñapa'  
e'ñech nemorrentuerranet ñamet.

26 Ama't e'ñe all ahua't Yomporpa' otanete't: "Sapa'  
ama nechemereyayso", te'ña allpa' o'ch  
eñotueret, te'ñapa' e'ño' puechemerasha' o'  
þhuerranet Yompor, ñeñt Yompor ñeñt  
ama arromña'teshayaye ama't ahua'ta.

27 Elloña Isaías ñeñt a'mtaye't Yompor po'ñoñ  
ahua'tpa' ñapa'cho'ña ate't eñose't, ñeñtcha'  
ate't perra israelena'tarnesha', ñeñtpa' ate't

ot: “Israelena’tarnesha’pa’ merenach nanac shonte’ atet ñerra’mrrate’ atet yenteññañ ontap po’mñer nanac shonte’. Tarraña ama’tcha’ shontetaña’ amachña allohuenacmaye’ a’qeshpatare’tterreto; patanta’ttsachña ñeñtcha’ a’qeshpatare’tterrtsa.

28 Tarro’mar Yomporpa’ e’ñech tsa’tatuerrana shonte’ acheñ arr patsro ñeñt atet otane’t ñeñt e’maye’t po’ñoñ. Amach allo’na ahuanta’nenaneto po’chñar.”

29 Ñeñtpa’ e’ñech atet perra ñeñt atet ote’t Isaías, ñeñtpa’ atet ot:

Ñeñt nanac Paretspa’ ahuo’t a’qeshpaterrey ama’t puesheña’ttso’eya. Ñerra’m ama atet pa’yeñepa’ allohueneypa’ e’ñech yocla’huerrañ e’ñe poctacma, atet panet ahuat allempo a’cllatuaretta allohuenet ñeñt ye’chatse’t añetso Sodomo ñaña Gomorro.

*Arrpa’ atto Yomporpa’ ama pocteye’ entenano judionesha’*

30 Ñeñto’marña te’pa’ yeñoteñ acheñenesha’ ñeñt ama judioneshayaye ama’t ama e’neñeto attoch e’ñe pocte’ entanet Yomporpa’ ñetña’pa’ ahuepa’t enteret ñeñt e’ñe atto pocte’ enteney Yompor allohueney ñeñtpa’ ñeñtña’ atto yeyemteña ñeñt atet oteney Yompor.

31 Tarraña judionesha’ ama’t e’neñetañ attoch pocte’ entenanet Yomporpa’ tarraña ñetña’pa’ ama entereto, tarro’mar ñaña e’ñe yemtenet o’ch e’ñe etsotuetañ ora allpon ñoñets ñeñt atet anarettenet; tarraña ama es etsotuenaye ora allohuen.

32-33 Yeñoteñ ama enterreto attoch pocte' enten-anet Yompor, tarro'mar ama yemteñeto Yompor ñeñt atet otenanet. Ñetpa' aña e'ñe yemtenet o'ch yečcatyenet ñeñt e'ñe cohuen entenet ñet. Ñeñtpa' e'ñe atet pohuet ñeñt atet oten Yompor po'ñoñ, ñeñt anuaret ahuatoteñ, ñeñtpa' atet ot Yompor ahuat:

Napa' o'ch nemñanet puesheñarr ñeñtcha' atarr sherberrets all añetso ñeñt pa'so'cheñ Sión ñeñtara Jerusalén. Tarraña ñetpa' čhach tsena'chet. Puetsena'teñoťetpa' o'huañ yemtenanet ñeñt atet noctape'chatanetañ. Tarraña ama't erra'tsena ñeñtcha' ame'ñerraya ñapa' ñetñapa' ellopa' amach alla es e'nerrete'te.

Ñeñtpa' atet toma'ntachet ahuat: Cristopa' ñach anareťtatsa arr patso atet ñerra'mrrate' mapue' ñeñt atarrcha' sherben. Tarraña judionesha'ñapa' ama asherbenaye' eñchet o'ama't mamesha, čha ot-tet ñerra'mrrate' atta epoto'tatse'tyeset ñesho ñeñt atma'ntataret mapue'.

## 10

<sup>1</sup> O'ch masheñneshacha' ñaña nočhaneshacha' notas, napa' neyočhrocmañen nemneñ namo'tsesha' ñeñtara israelena'tarpa' o'te' queshpa'huerret ñamet. Ñeñto'marña ñocpuetpa' čhocma nema'yochamñpenanet Yompor.

<sup>2</sup> Napa' neñotenanetañ e'ñe po'ñoč mueneñetañ o'ch e'ñe sherberet Yompor, tarraña ama't atet muenenetañpa' po'ñočpa' ama čhenanetoña pueyočhreto ñeñt po'ñoč atet muenen Yompor.



<sup>3</sup> Po'ñoçhpa' ama çhenaneto pueyoçhreto ñeñt' atet muenen Yompor atetcha' yeþa attoch pocte' enteney ama't e'ñe allohueney. Ñetpa' otenapuetañ e'ñe pueyeçhcateñoçet ñeñt' cohuen entenet ñetpa' Yomporñapa' pocte'te' entapretenanet. Elloña ñetpa' ama mueneñeto o'ch yemterrñañet ñeñt' atet oteney Yompor, ñeñt'cha' attoch e'ñe po'ñoçh pocte' enterrey ña.

<sup>4</sup> Tarro'mar te'pa' o' huapa Cristo ñaña atet oteney Yompor ñerra'm yame'ñerrñaña Puechemer ñeñt' Cristotetspa' attochña e'ñech pocte' enterreyña, ama't erra'tsena ñeñt'cha' ame'ñerraya. Allochñapa' o'huañcha' aña yeyemtena o'ch atet yeþohuen e'ñe cohuen ora allpon ñoñets ñeñt' atet anaret attochña pocte' enterryeñ Yompor.

*Arrpa' attoch e'ñe pocte' enteney Yompor ama't eseshaya*

<sup>5</sup> Ama't Moiséspa' atet ote't ahuat: "Ñerra'm yeþohuenach e'ñe poctacma ñeñt' atet anaretpa' esheccha'ña corretsayach errponohuañen."

<sup>6</sup> Tarraña attoch po'ñoçh pocte' enteney Yompor ñeñt'pa' e'ñech yeyemteñoç' ña ñeñt' atet oteney: "Amach yoctape'chatsto yeyoçhro, ñato' este' yepalltena tarro'mar ama yepallteno o'ch ahuey ento attoch ya'suater Cristo arr patsro.

<sup>7</sup> Amaña yepallteno o'ch ahuey ñaña arromñañeshesho ñeñt' o'pono'tsa'yen patso o'ch yetantatera' Cristo tarro'mar ñapa' ahuatoçet' o' tanterra, ama arromñañesho'tsenayaye."

<sup>8</sup> Tarro'mar Yompor po'ñoñpa' atet oten: "Añ cohuen ñoñets alloch yequeshperra, ñeñt'pa' ama

torrapahuoyaye attoch yenter, tarro'mar ñeñtpa' e'ñe yesho'tsen. Ñaña ama echarroyaye attoch ye'ñoroña, tarro'mar ñeñtpa' e'ñe yeyoçhro'tsen." Ñeñtpa' ñeñtara ñoñets ñeñt o' neserrpare'tatas atet añ poctetsa o'ch yame'ñera Cristo.

<sup>9</sup> Tarro'mar ñerra'm cho ye'ñorena atto Jesúsapa' Yepartseshar yepen, ñaña ñerra'm e'ñe yeyoçhrocmañen yame'ñeña atto Yomporpa' ahuo't tantater po'rromño'tpa', allochñapa' yapa'cho'ña a'qeshpatareteycha'.

<sup>10</sup> Tarro'mar ñerra'm yame'ñera Cristo yeyoçhrocmañen, Pomporñapa' e'ñech pocte' enteney, ñaña ñerra'm çhochña ye'ñorena atto o' yame'ñera Cristo, attochña yapa' a'qeshpatareteycha'.

<sup>11</sup> Ñaña Yompor po'ñoñ ñeñt aquellca'huaret ahuatoteñ, ñeñtpa' atet oten: "Ama't erra'tsena ñeñtcha' ame'ñerraya Yomporpa' ñetña ellopa' amach alla es e'nerrete'te."

<sup>12</sup> Tarro'mar ama judioneshayaya ñapueñt ame'ñenayoña Yompor. Ama't ñeñt ama judioneshayaye, ñetpa'cho'ña attecma ame'ñeñet Yompor. Tarro'mar e'ñe patrra Yepartseshar ñeñt e'ñe allohuenacpay. Shonte'ch esocmañen apa'yesuay ama't eseshaycha' ñeñtey enamuene'.

<sup>13</sup> Tarro'mar atet oten Yompor po'ñoñ: "Allohueno'teypa' ama't erra'tseno'teta çhore'te' Yompor pueyoçhrocmañen attoch a'qeshpataretterretpa' Yomporñapa' a'qeshpaterranetcha'."

<sup>14</sup> Tarraña amach erroteno't yechore'cheña Cristo ñerra'm ama cho yeyemteño. Ñaña

amate' errotenoť yeyemteroña ñerra'm ama es ye'mare'tperro Cristocop. Ñaña amach errotenoť ye'mare'che ñerra'm ama eñalle ñeñtcha' a'pote' po'ñoñ.

15 Ñaña amach errotenoť a'poteññañetoña Yompor po'ñoñ, ñerra'm ama ña llesensenahueto. "Nanac cosheñtso'tseney ñerra'm esempo huapa ñeñtcha' a'potose' cohuen ñoñets ñeñt huetsa Yomporeshoť alloch yocsherra e'ñe cohuen yeyoćhro." Añpa' allohua ñeñt e'ñe atet aquellca'huaret Yompor po'ñoño ahuatoteñ.

16 Tarraña ama't ñeñt pue'maran Yompor po'ñoñ amaña allohuenacmaye' ame'ñereto añ cohuen ñoñets ñeñt huetsa Yomporeshoť. Ama't atet ote't Isaías ahuat, ñeñtpa' atet ot: "Ama Nompore eseshaye' ame'ñenayo ñeñt atet o' neserrpare'tatuanet." Arrpa' allohua ñeñt atet ote't Isaías ahuat.

17 Tarraña ama't atteñpa' elloña napa' o'ch notas, e'ñe yeserrpare'teñoť Cristo po'ñoñ, acheñenesha'ñapa' o'ch e'mñoteñet. Allochñapa' e'ñe pue'mñoteñoťetpa' o'ch ame'ñeret Cristo.

18 Ñato' sapa' čhate' sotenapañ judionesha'pa' ñato' amate' pue'mareto añ cohuen ñoñets ñeñt huetsa Yomporeshoť. Tarraña napa' o'ch notas, po'ñoćhca'ye pue'maret țarro'mar atet oten Yompor po'ñoñ:

Ñeñt a'potene' Yompor po'ñoñpa' o' eñotatyaset erracmañen arr patsro, o' epa'huamocha Yompor po'ñoñ errařaren.

19 Te'ña sapa' ñato' čhate' sotenapañ judionesha' ñeñtara israelena'tarpa' ñato' amate' čhenaneto

pueyočhreto ñeñt atet cotape'chen Yompor. Tarraña napa' o'ch notas, po'ñočhca'ye eñoteñetañ Yomporña'pa' o'ch ame'ñaterrana ñaña po'poñ acheñ ñeñt ama judioneshayaye. Ñehua, ñanompa' o'ch neyerpaterrsa ñeñt atet ote't Moisés. Moisés ahuatpa' ahuo't quellcanet añ ñoñets ñeñt atet och Yompor, ñeñt'pa' atet ot Yompor:

Napa' o'ch name'ñatera po'poñ acheñenesha' ñeñt sapa' atta senteñ atet ñerra'mrrate' ama nechemereye' nepenaneto ñaña atta senteñ ñerra'mrrate' ama es eñoteneto. Tarraña napa' o'ch name'ñatuerranet ñetpa' sañapa' e'ñe sempa'teñoñenpa' o'ch se'moñe'terranet, tarro'mar allempo ñetpa' o'ch nechemerasha' neperranet ñamet. Arrpa' allohua ñeñt Moisés po'ñoñ ñeñt atet och Yompor ahuat.

20 Allotpa' ñaña Isaías ahuat ñaña'pa' ama mecha'tenano judionesha'. Ñapa' ahuo't eñotatanet ñeñt atet och Yompor, ñeñt'pa' atet ot Yompor:

Po'poñ acheñ ñeñt ama judioneshayaye ama't ñetpa' ama eseshaye' ne'nenaye, ñetña'pa' o' enterrnet. Ama't ama eseshaye' na'p'to'tenaye erroteneñe'ña na ñeñt atet nepena, tarraña nañapa' o'ch neñotaterranet ñeñt atet nepena.

21 Ñaña ellonet Isaíaspa' serrpare'te't atetcha' perra judionesha' ñeñt atet eñorena Yompor ñocpuet, ñeñt'pa' atet ot Yompor: “Napa' nellapene'tcha' chore'tame'tene' añ acheñeneshar attoch ñetpa' o'ch ame'ñerrnet. Tarraña amachña eseshaye' name'ñenayo, chachña po'poñ

entuenet allohuenet.”

## 11

*Atto judionesha'pa' a'ypo'ñareñtenetañ, tarraña ama poctacmaye' a'ypo'ñenanetoña Yompor*

<sup>1</sup> Tarraña ama't atteñ, napa' o'ch notas, po'ño'ch Yomporpa' ama e'ñe poctacmo' a'ypo'ña'huerrano pueyochresha'chno, ñeñtaret ñeñtet israelena'tarnesha'. Atet ñerra'm na, napa'cho'ña israelena'taren tarro'mar napa' po'ñrenñen Abrahamañ ñeñtara Benjamíñeñ mereñtsoren.

<sup>2</sup> Yomporpa' ama a'ypo'ña'huerrano pueyochresha'chno. Ñetpa' e'ñe eñotuanete't ahuat ñeñtcha' pueyochrenesha'chno pa'. Ñaña napa' neñoteñ amach a'ypo'ña'huerraneto, tarro'mar ñeñtpa' atet aquellca'huaret Yompor po'ñoño ama't ahuatoteñ. Sapa' ama't seyerpuenoña ñeñt atet pe't Elías ahuat. Ñapa' ahua't otteñe'chan israelnesha' e'ñe puema'yocheño' Yompor.

<sup>3</sup> Ñeñtpa' atet otan Yompor ahuat: “Nompore, namo'tsesha' ñeñtara israelena'tarpa' epaye' muetsanatennapet ñeñt pa'mítene' peñoñ. Ama't ñaña Nompore ñeñt altar ñeñt allot yeshervenpeña' o' e'ñe tore'tatuonapet. Ama't napa' o' e'ñe naptama ñeñten pame'ñenaya. Ama't te' Nompore napa'cho'ña o'patennet ahua'ch muetsanet naña.” Arrpa' allohua ñeñt atet otteñe'chane't Elías pamo'tsesha' Yomporesho ahuat.

<sup>4</sup> Arrña'pa' atto eñorana'tana Yompor Elías ñeñtpa' atet och: “Amaca' paptayaya ñeñtep

name'ñenaya, elloña eñallmeñ cančhroch mil israelena'tarnesha' ñeñt name'ñenaya ñeñt ama concorpana'tenana' ma'yochaya ñeñt ayečhcataret ñeñt sochenet Baal. Ñetñapa' nenenanet ellonet nocop." Arrpa' allohua ñeñt atet neyerpatensa atet ote't ahuat Yompor allempo eñorana'tana Elías.

5 Ñaña atet ñerra'm te'pa' attecma pena Yompor. Ama allohuenacmaye' a'ypo'ñenanetoña Yompor. Ñaña'papa' ama't puesheña'ttsapa' ahua't ye'cherranet allochñapa' attochña e'ñe puemuereñoñanetpa' o'ch a'qeshpateranet.

6 Tarraña e'ñe puemuereñoñanet ahua't a'qeshpatanet. Amaña añoŕeyaye atto cohuen es yečhcatyenet ñet. Tarro'mar ñeñt cohuen yečhcatyenet ñerra'm allo a'qeshpatenetaña' Yomporña puemuereña'papa' amate' a'qeshpatañe'ye' yenteñe.

7 Ñeñto'marña yeñoteñ, israelena'tarpa' ama allohuenacmaye' enterreto ñeñt e'nenet. Ñehua, ñeñt e'nenetpa' ñeñtpa' attoch e'ñe pocte' enterranet Yompor. Puesheña'ttsa enterre' ñeñt ye'chena Yompor. Tarraña po'potantañña'papa' ama enterreto ñeñt atet muenen Yompor ñeñt attoch e'ñe pocte' entuerrey tarro'mar ñetpa' čhocma echarrtenanet pueyočhreto o'ch pet ñeñt atet muenen Yompor.

8 Ñetñapa' o' e'ñe atet pohuet ñeñt e'ñe atet anuaret Yompor po'ñoño ama't ahuatoteñ. Ñeñtpa' atet oten: "Yomporpa' ñach ama muenatahueto o'ch es čchahuet pueyočhreto.

Ama'tcha' cho es entenetañ ñeñt atet pena Yomporpa' amach chenaneo pueyoçhreto ñeñt atet muenen Yompor. Ñaña ama'tcha' e'mñoteññañetañ Yompor po'ñoñpa' amach çapaneto pueyoçhreto ama't ahuata ñeñt atet muenen Yompor. Ama't teme'ttsenpa' attecma penet." Arrpa' allohua ñeñt atet ote't Isaiás ñeñtcha' atet perra judionesha'.

<sup>9</sup> Elloña Davidpa'cho'ña ñapa' atet ote't ahuat, ñeñtpa' atet ot:

Judionesha'pa' nanac a'nateña Yompor. Shonte' esocmañen echenet ñeñt alloch rrallme'chapretannenet. Tarraña ñeñtpa' cha shequënanet tarro'mar ñetpa' otenapuetañ Yomporpa' e'ñe'e' pocte' entenonet. Tarraña ñeñtpa' ama atteyaye. Ñeñtpa' ñeñtcha'ña a'chencaterrahuet. Attoch e'ñe tsa'tatuerranet.

<sup>10</sup> Ellopa' alla oterrerr David ñocpuet, ñeñtpa' atet ot:

Arepa'ch es çapahueto pueyoçhreto ñeñt atet muenen Yompor, attetach ñerra'mrrate' aporo'yet ñeñt amach enteno. Chocmuepa'ch amue-roçhtatarettenet e'ñech attet ñerra'mrrate' eñerr a'mo'ca'nenahuet ñeñt nanac amue-roçhtatañ.

*Atto Yomporpa' a'ypo'ñaneñ judionesha', ñeñtpa' añecop attoch a'quesçpaterran ñaña ñeñt ama judioneshayaye*

<sup>11</sup> Tarraña ama't atarr atpare'tena judionesha', napa' o'ch notas, amach e'ñe a'ypo'ña'huereto poctacma Yompor. Tarro'mar

e'ñe patpare'teñoťet ñetpa' attoña Yomporpa' ahuo't ame'ñaterrana po'poñ acheñ ñeñť ama judioneshayaye attoch a'queshpatteranet ñamet. Attochña judionesha'pa'cho'ña e'ñe puempa'teñoťet Yomporpa' ñato' o'ch alla ame'ñeret Yompor e'ñe cohuen.

12 Atto atpare'tenan judionesha' Yomporpa' po'poñechnoña acheñenesha' arr patsropa' ahuo't chapanet attoch ame'ñeret ñamet Yompor. Ñehua, atto ama't patpare'teñoťetpa' yenpueñet po'poñ acheñ ñeñť ama judioneshayaye, yapa' yeñoteñ esempohuañen allempoch alla ame'ña'hueret Yomporpa' elloña pame'ña'hueñoťetpa' nanaccha' yenpueret po'poñ acheñ ñeñť ama judioneshayaye.

13 Ñeñťpa' atet notenes ñeñťes ama judioneshayayso tarro'mar napa' allsensareten nach serpare'tene' Yompor po'ñoñ socop ñeñťes ama judioneshayayso. Ñeñťo'marña napa' nocshena, atarr cohuen asherben nenteñ ñeñť atet llesenseñen Yompor.

14 Tarro'mar allochñapa' attoch name'ñatera ñeñť ama't ama judioneshayaye. Attochña ñato' judionesha' ñeñť e'ñe namo'tsna'taranetpa' e'ñe puempa'teñoťet Yomporpa' o'ch alla mueneret o'ch ame'ñerret ello atet sepena sa. Allochñapa' attochña a'queshpataretterret ñamet, ama't puesheña'ttsoña.

15 Tarro'mar ñeñť atto Yomporpa' ahuo't a'ypo'ñan judionesha', ñeñťpa' añecop attoch amo'tsterrana po'poñechno acheñenesha' arr patsro ñeñť ama judioneshayaye. Ñaña yapa'



yeñoteñ ñerra'm esempohuañen allempoch judionesha'pa' o'ch alla ame'ña'hueret Yompor, attochña o'ch alla aguërranet; ñetña allempopa' çhach otterret ñerra'mrrate' rromot o' tantuerret.

16 Tarro'mar atto ñeñt ñanom judioneshatatset ahuatpa' ñetpa' anarettete't Partsocop, allochñapa' po'mrenñenesha'pa'cho'ña ñetpa' acrare'tterretcha' ñamet e'ñe attecma. Ñato' o'ch yetma'ntacha atet pete't ahuat pocrrañ ñeñt nete't Partsocop. Ñeñt ñenma't pocrrametpa' ahuo'ch yoreñet coñe't ñeñt nanac cohuen ñeñtcha' nenet Yomporecop. Ñaña atto ñeñt ñanom pocrrañ yorenet Partsocoppa' ñeñt'pa' e'ñe cohuen, añña allot yoret pocrrametpa' ñeñtña pocrramet orapa' e'ñech cohuenare'. Ñaña ñato' o'ch yetma'ntacha po'poñ ñeñt atet pena tsachreçh. Ñehua, ñerra'm erra'tsen tsach ñerra'm puerçhoçhno e'ñe cohuenare' puetaçreçhnopa'cho'ña e'ñech cohuenare'.

17 Te'pa' ñeñtes ama judioneshayayso napa' o'ch notas, Yomporpa' ahuo't ellopa'tetstatan patantarr judionesha' ñeñt atpare'tene' ña. Allochñapa' attoch sapa' o'ch separrocmaterr epas ñeñt ame'ñenaya Yompor. Ñato' o'ch netma'ntacha atet pena tsach ñeñt otenet olivoch. Ñehua, judionesha'pa' ñetpa' atet ñerra'mrrate' olivoch ñeñt e'ñe cohuen narmets. Tarraña ñato' ñeñt allpon puetaquërpa' ahuo't pecha'tam'pset ahuo't huapore'chet. Allochñapa' attoch a'tapa'lllateret epuet ñeñt puetsato'mar olivochtaquër ñeñt ama narmetsoyaye. Sa ñeñtes ama judioneshayaysopa' sapa' añña puetaquër

sepene' ñeñt̃ puetsa'to'mar olivoçtaquër. Te'ñapa' o' a'tapa'llataterret olivoçtacro allot apecha'taret ñeñt̃ ahupore'taret. Allochñapa' attochña sapa'cho'ña o'ch separrocmater epas ñeñt̃ ame'ñenaya Yompor, ñaña attoch sagapapreter Yompor pa'nateña ñeñt̃ atet otane't Yompor judionesha' pa'tañeshañ ahuat̃.

18 Tarraña ama't atteña' sapa' amach sañeña nanac asherben sentatsterro. Ñaña amach sotatsto o'huañte' sherbenña añ judionesha' ñeñt̃ toma'ntenaya olivoçtaquër ñeñt̃ ahupore'taret, tarro'mar sapa' señoche'pa'ch allotca'yeña huenaña sa sehuamenc tsachreçhot ñeñt̃ atma'ntataret judionesha' pa'tañeshañ ahuat̃. Ama atteyayso ñerra'm ñeñt̃ e'ñe puetacres o'ch ahua mencat sepoñ puerech, tarro'mar ama atteyaye, puerechña e'ñe ahua mencat sepene'ña sa.

19 Ñeñtes ama judioneshayayso, sapa' çhate' sotenapañ so'te'ña nanac sherbets ñeñto'maro' Yomporpa' ahuo't pecha'tam̃psan judionesha' olivoçtacrot̃ allochñapa' atto'ch sapa' o'ch e'ñe separrocmater.

20 Tarraña napa' o'ch notas, ama't po'ñoçh o' a'ypo'ñare'tta judionesha' añecopña a'ypo'ñare'tterret e'ñe patpare'teño'tet Yompor. Ñehua, te'ña sapa' e'ñe seyemteño'fa Yompor o' separrocmater sa. Ñeñto'marña o'ch notas, amach sommo'chatsto, e'ñepa'chña semcha'na'teño'f same'ñeña Yompor.

21 Tarro'mar atto Yomporpa' ahuo't huapore'tan olivoçtaquër ñeñt̃ e'ñe puetacra ñeñt̃

toma'ntenaya judionesha' ñeñt̃ ama ame'ñenayo ña, sapa'cho'ña ñerra'm attach sepena sam̃apa' ahuapore'taretescha' sam̃a.

<sup>22</sup> Señochepa'ch po'ñočh Yomporpa' atarr cohuen amueraña. Tarrña ama't amuerañañpa' ama allocchama'metsoyaye, tarro'mar ñapa' chocmach tsa'taterrana ñeñt̃ ama ame'ñenayo ña. Ñerra'm chocmach seyemteña atto nanac muerensa ñaña' e'ñech cohuen entenes. Ñerra'm amach atet sepopa' sapa'cho'ña ahuapore'taretescha' atet ñerra'm tsachtaquër.

<sup>23</sup> Ñaña ama't judionesha' ñeñt̃ a'ypo'ñareftetsapa' ñerra'm o'ch alla ame'ña'hueret Yompor, ñaña' o'ch alla parrocmatateranet po'pocheño. Tarro'mar Yomporpa' nanac ahuamencat, ña po'huamenco'pa' o'ch alla parrocmatateranet po'pocheño.

<sup>24</sup> Tarro'mar sa ñeñtes ama judioneshayayso Yomporpa' e'ñe pocte' eñch o'ch parrocmatateres, ama't sapa' atet entenes ñerra'mrrate' nanac alla'paro'tsenes atet pena ñeñt̃ puetsato'mar olivoch. Ñaña sapa' apechtacre'charetes po'pchañoť, ñaña' ahuo't a'parrocmaterres olivochtacro ñeñt̃ narmets olivoch ama't sapa' ama e'ñe puetacreyayso ñeñt̃ narmets olivoch. Atto pocte' eñch Yompor ñeñt̃ atet p̃onas sa, elloña judionesha'pa' nanaccha' cohuen enterranet o'ch alla parrocmatateranet, o'ch alla puetaquër p̃aterranet olivoch ñeñt̃ e'ñe ño puetaquër.

*Atto judionesha'pa' a'queshp̃ataretterretcha' ñamet esempohuañen*

25 Te'pa' o'ch masheñneshacha' ñaña nochaneshacha' neñotatas ñeñt' ahuatoteñ ama eñotpahuoyaye. Ñeñtes ama judioneshayayso napa' nemneñ o'ch e'ñe seño ch allochñapa' attoch amach sotaḡsa'tatsto sapa' atarro' es señoten. Ñeñt' atet atpare'tena patantarr israelena'tarpa' ñeñt'pa' mamecpa atet muenatenanet Yompor tarremphuach allempoch e'ñe etsotua attoch ame'ña'huerra allpon acheñenesha' ñeñt' ama judioneshayaye.

26 Allempochña allohuen israelena'tarnesha'pa' a'qeshḡataretterretcha' ñamet. O'ch etsoterra e'ñe atet aquellca'huaret Yompor po'ñoñ ahuatoteñ, ñeñt'pa' atet ote't Yompor:

Ñeñt'cha' a'qeshḡaterrahueta'pa' huapach. Arrot'cha' huapa ñeñt' anetserpa' añ pa'so'cheñ Sión. Ñeñto'marña pamo'tsna'tarcha' ḡosan israelena'tarnesha'. O'ch huapapa' a'huañañperrancha' Jacoboñ po'ñreneñ\*

27 Allempochña nahuanmañperranet po'chñaretpa' allempochña etsoterra ñeñt' atet notanete't ahuat' ñeñt'cha' atet neperranet esempo. Arrpa' allohua ñeñt' atet ot Yompor ahuat.

28 Tarraña te' Yomporpa' atet entenamet ñerra'mrrate' ñeñt' e'moñe'tene' tarro'mar ñetpa' ama mueneto o'ch ame'ñeññañet po'ñoñ ñeñt'

\* 11:26 Ñeñt' otenet israelena'tarnesha', ñaña síono'marnesha', ñaña Jacob po'ñreneñ, ñaña jerusaléño'marnesha' ñetpa' ñeñtareta judioneshet.

alloch po'ñoçh yequeshperra. Tarro'mar atet pena allochñapa' o'ch sa'queshpataretterra samã ñeñtes ama judioneshayayso. Tarro'mar Yomporpa' ahuatoteñ acrane't judionesha' ñeñtcha' atarr morrentena tarro'mar ñeñt pa'tañneshañ pete'tpa' ña a'crahuete't ahuat ñeñtcha' atarr morrentena.

<sup>29</sup> Tarro'mar Yomporpa' ama puenesho po'ñoñ. Atet otanete't ahuat ñeñtcha' o'pataterranetpa' e'ñech etsotuerra. Ñaña atet otanete't ñeñtcha' atet chore'terranet attoch e'ñe ame'ña'hueretpa' ñeñtpa'cho'ña e'ñech etsotuerra.

<sup>30</sup> Ahuat sapa' atarr satpare'che't Yompor, te'ñapa' judionesha' atet petsa atet satpare'te't sa ahuat. Tarraña te'pa' allempo atpare'ta judionesha'pa' ñeñtpa' attoch Yomporpa' o'ch muererrsa samã.

<sup>31</sup> Ñaña te'pa' atto judionesha' attecma atpare'teñet Yompor atet satpare'che't samã ahuat, ñetpa'cho'ña muererranetcha' atet muerensa samã te'.

<sup>32</sup> Tarro'mar atet penaña Yompor. Ñapa' muenatenan ora pa'namen acheñ o'ch atpare'tyeñet allochñapa' attochña ellopa' o'ch alla muererraneterr allohuenet.

*Atto Yomporpa' ama eñotpahuoyaye ñeñt e'ñe atet cotape'chen ña*

<sup>33</sup> Yomporpa' puemorrenteño'tpa' esocmañen apa'yeney, ñeñtara Parets ñeñt atarr eñotañtetsa. Shonte' esocmañen eñoten pa'namen. Ya arromña'teypa' amate' errotenot yeñotuoñeña ñeñt atet penaña ña. Ñaña ama't mameshapa' amate'

errotenot çhaponayoña ya yeyoçhro ñeñt ora allpon ñeñt atet cotape'chyen ña.

<sup>34</sup> “Tarro'mar yapa' ama't puesheñarrofeya amate' errotenot yeñotuoña ora ñeñt atet cotape'chen Yompor. Ñaña yapa' ama't puesheñarrofeya amate' errotenot yotape'chacheña Parets.

<sup>35</sup> Ñaña yapa' ama't puesheñarrofeyapa' amate' errotenot yetsa'choña Yompor attoch aphuerrey ñeñt yemnen ya.”

<sup>36</sup> Tarro'mar ama't allohuen ñeñt allpon es eñalleyetsa e'ñe Yomporeshotecma huena, e'ñe ña po'huamencoñ eñalletena, ñaña e'ñe ñocop yechcatue. E'ñepa'ch ya'ye'chochtateññañ tayoteñ ama't errponañohuen. Ñeñtpa' attetepa'ch Nompore.

## 12

### *Atto añ poctetsa o'ch e'ñe yaphuer Yompor yechets*

<sup>1</sup> Ñeñto'marña te'pa' o'ch masheñneshacha' ñaña noçhaneshacha' notas, atto Yomporpa' atarr muerenya, yapa' añ e'ñe poctetsa o'ch yaphuer Yompor yechets. O'ch yaphuer allohuen yechets atet ñerra'mrrate' ñeñt muetsete't ahuat Yomporcop ñeñtcha' nenet ñocop. Tarraña ya yechets e'ñech betnatot yaphuer Yompor tarro'mar ñeñtpa' e'ñech ñocpa, ñeñtcha' nanac coshatene' ña. Attochña e'ñech yeyoçhrocmañen cohuen yoçter Yompor.

<sup>2</sup> Allochñapa' amach allo'na atet es yepatse'tyesneno ñeñt atet yeychen ya añe

patsro, ellochña yoc̄tape'cherr etserra attoch etserrataterrnay Yompor yoc̄taṗña. Attochña e'ñe cohuen señoche erra'tsente'ña muenen Yompor ñeñt̄ e'ñe cohuen enten ña, ñaña ñeñt̄cha'ña coshatene' e'ñe poctacma.

*Atto Yomporpa' ama pocteye' entenye o'ch yot yañeña yo'ña nanac sherbets*

<sup>3</sup> Yompor puemuereñoŋenpa' ahuo't llesensenen attoch nach torretsa ñocop. Ñeñto'marña te'pa' notenes ñeñt̄ atet muenen Yompor. Ama't puešeñarroŋesapa' amach sentatsto sañeña ñeñteso' ello nanac sherbets. Añcha'ña pocte' sentena allpon sesherven atto puešeña'ttsos Yomporpa' ahuo't apa'yesas attoch e'ñe seyemteñoŋ seŋorra'yesa ñocop.

<sup>4</sup> Ñato' o'ch yetma'ntacha ñeñt̄ atet pena yechets. Ñehua, yechetspa' ama e'ñe paŋrrayaya, atet ñerra'm yecle' ñaña yot ñaña yetac. Ñaña ama e'ñe paŋrrayaye sherbenye, e'ñe po'poñe'ttsocma sherbeney. Tarraña ama't po'poñe'ttsocma sherbeneypa' e'ñe yocma yechets yeṗohueñ, ŋarro'mar e'ñe paŋrra yechets atet petsa.

<sup>5</sup> Ñaña attecma yepena allohueney ñeñtey ame'ñenaya Cristo. Ama't shonteyeñ ñaña ama'tcha' po'poñe'ttsocma yeŋorra'yesa ñocoppa' ñaña'pa' e'ñech paŋrra enteney, atet ñerra'mrrate' e'ñe po'chets peney. Attochña e'ñech yeparrocmaten e'ñe puešeña'ttsoy epay Cristo. Attoña e'ñe yeparrocmateñoŋ Cristopa' o'ch yeparrocmatuahua allohueney ñeñtey ame'ñenaya Cristo.

6 E'ñech po'poñe'ttsocma yetorra'yena Yomporecop, tarro'mar ñapa' ahuo't apa'yese y e'ñe po'poñe'ttsocma ñeñcha' atet yesherbe' e'ñe cohuen. Ñehua, ñerra'm añ apueney alloch ya'potoñ po'ñoñpa' ya'potepa'ch errponcha' yemtatena.

7 Amapa' ñerra'm añ apueney attoch yesherbe' po'psheññechno e'ñepa'chña cohuen yesherbenanet. Amapa' ñerra'm añ apueney attoch yeychateñ po'psheññechno e'ñepa'chña cohuen yeychatyenanet.

8 Amapa' ñerra'm añ yeñoten attoch yocape'chatyesanet ñeññ cohuentetsa Yomporecop, e'ñepa'chña cohuen yocape'chateñ acheñenesha'. Amapa' ñerra'm añ yeñoten attoch es yapa'yes acheñenesha' ñeññ es pallta'yetsapa' e'ñepa'chña yeñmañeshocmañen es yapa'yenanet, amachña cha yempa'tana'tatsche. Amapa' ñerra'm añ yeñoten attoch ya'mñcha'tareñtena, e'ñepa'chña yocsheñeshocmañen ya'mñcha'tareñtena, amachña cha yemuenme'chatsche. Amapa' ñerra'm añ yeñoten attoch yeyenpue' ñeññ muerochtetsa, e'ñepa'chña yocsheñesha' yeyenpuenanet.

*Atetcha' pa'yesa ñeññ pueyochresha' pen Cristo*

9 Amorrentanna'tpahuepa'ch yentannena e'ñe yeñmañeshocmañen. Ñaña allohuen ñeññ ama cohuenaye' enteno Yompor o'ch e'ñe ya'mñechya nanac attoch ya'ypo'ñe'. Tarraña allohuen ñeññ e'ñe cohuen enten Yomporpa' amach cha ya'ypo'ñatsche.



10 Ñaña añ poctetsa amorrentanna'tpo'ch yentannena allohueney atet ñerra'm po'ñoch e'ñe yemo'nasheñ yeñannena. O'ch atet yeñich po'psheñeñ ñapa' atarr sherben, amachña yañeña nanac asherben entetso.

11 Amach cha seçllana'tatsto torraya ñeñt cohuen enten Yompor. Añcha'ña e'ñech seyoçhrocmañen sesherbe' Yepartseshar atto ahuaumentat penes Parets Puecamquẽ.

12 Ñaña e'ñepa'ch socshena tarro'mar yapa' e'ñe yeyemteñoñ yecuenña ñeñt o'patatenya Yompor. Ñaña ñerra'm esempo huaponasa mueroçhteñets e'ñepa'chña sa'huante'. Ñaña çhocmuepa'chña sema'yocheña Yompor.

13 Ñaña ñeñt pueyochresha' pen Yompor ñerra'm esempo es pallta'yenet, sañapa' sapa'yesanetcha' ñeñt pallta'yenet. Ñaña e'ñepa'chña cohuen sagapannena sepacillo.

14 Ñaña añ poctetsa o'ch senamoñ Yompor attoch a'natana ñeñt se'moñe'tene'. Amachña cha sarrnomare'tatscho.

15 Ñaña ñerra'm esempo esesha' atarr coshetsa, sapa'cho'ña socshapretanetepa'ch. Ñaña ñerra'm esempo esesha' yahuetsa puellquẽñoñ, sapa'cho'ña sellcapretanetepa'ch.

16 Amachña cha atsrre'moçhen sentanna'teno. Ñaña amach aña se'natsto attoch sommo'chena. Añcha'ña pocte' senten o'ch seyemteña ñeñt ama esoshe'maye' entyeneto. Ñaña amach sentatsto sañeña, so'ña e'ñe sapuet atarro' es señoten.

17 Ñaña ñerra'm po'psheñeñ erroten ðaspa' sapa' amach setsa'tatatsche ama't coñe'ta. Sapa'

añcha'ña e'ñe sema'yochra ñeñt̃ chocma sepena ñeñt̃ cohuen enten allohuen acheñenesha'.

18 E'ñe puesheña'ttsospa' chochña se'nyes ñeñt̃cha' atet sepa'yes ñeñt̃ pocte' enten allohuen acheñenesha'; attochña e'ñe cohuen sentannena. Allochñapa' o'ch socrrena e'ñe cohuen muechet̃ e'ñe sagattsa ñeñt̃ parro'marneshas.

19 Te' o'ch masheñeshacha' ñaña nochaneshacha' e'ñe nemorrenteño'tespa' o'ch notas, ñerra'm esempo po'psheñeñ erro't̃ p̃aspa' sañapa' ama't̃ coñe'tapa' amach setsa'tatatsche. Añcha'ña semnat Yompor atto ñapa' tsa'taterranetcha'. Tarro'mar ñeñt̃pa' atet oten Yompor po'ñoñ ñeñt̃ anuaret̃ ahuatoteñ. Allempo atet otanete't̃ Yompor, ñeñt̃pa' atet ot: "Napa' ñaña ñeñten atsa'tatañen, napa' nach tsa'tatuerrahuet." Arrpa' allohua ñeñt̃ atet ote't̃ Yompor.

20 Añcha'ña atet señoñ ñeñt̃ se'moñe'tene' ñeñt̃ e'ñe atet oteney Yompor po'ñoñ. Ñehua, ñeñt̃pa' atet oten: "Ñeñt̃ se'moñe'tene' ñerra'm esempo cheporrenapa' sañapa' sapepa'ch ñeñt̃cha' rra'. Ñaña ñerra'm esempo oñpa'ten sañapa' sapepa'ch ñeñt̃cha' orr. Ñerra'm atet̃cha' sepe'pa' ñaña'apa' o'ch penquëna nanac. Atarrcha' atserr e'man atto penquëna. Allempoñapa' ñato' e'ñe puepenquëño'tpa' ñeñt̃cha'ña cotape'chaterre' cohuen."

21 Ñeñto'marña notas, ñerra'm esempo po'psheñeñ erro't̃ p̃aspa' sapa' amach sañeña muenatstaye o'ch alla setsa'tatera. Añcha'ña atet sepa' ñeñt̃ e'ñe cohuentetsa. Ñerra'm atet̃ yepenapa' e'ñe yepeño't̃ cohuenpa' o'ch ya'huañat

ñeññ ama cohuenayaye.

## 13

*Atto añ poctetsa o'ch yame'ñeña ñeññ amicha'taretetyetsa añe patsro allochñapa' attoch yocrrena e'ñe cohuen muechet*

<sup>1</sup> Ñaña añ poctetsa e'ñe puesheña'ttsoypa' o'ch yame'ña ñeññ amicha'taretetyetsa ñeññ pueyochresha' pen gobierno'. Tarro'mar amach eñallñeña ñeññcha' amicha'taretetyetsa ñerra'm ama Yompor muenatenahueto o'ch atet pet. Tarro'mar ñeññ amicha'taretetyetsa arr patsropa' ñetpa' Yompor muenatenahueto o'ch atet pet.

<sup>2</sup> Ñeñño'marña yeñoteñ ñerra'm esesha' atpare'tene' ñeññ amicha'tarettetsa arr patsro ñapa' añe'na atpare'ten Yompor, tarro'mar Yomporpa' ña muenatenahueto o'ch amicha'taretetyenet arr patsro. Ñaña ñeññ atpare'tene' ñeññ amicha'tarettetsa arr patsro ñapa' e'ñe ñañeña patpare'teñoi' atsa'tatarettach.

<sup>3</sup> Ñaña ñerra'm chocma ye'pa'yen ñeññ cohuen enten amicha'taretpa' amach amicha'nochenaye' yenteñeña ñeññ amicha'tarettetsa, tarro'mar e'ñe attotapa' amach erroť pa'ye. Tarraña ñeññ atpare'tene' ñeññ atet muenen amicha'taretpa' ñetñapa' atarrcha' amicha'nochen enteñetña amicha'tareť tarro'mar amicha'taretpa' chocmach tsa'taterranaña ñeññ atpare'tene' ña. Ñehua, ñerra'm ama semno o'ch amicha'nochen señch amicha'taretpa' e'ñechña cohuen es se'pa'yen, attochña amicha'taretpa' e'ñech cohuen entenes, amach erroť pa'so ama't mamesha.

4 Tarro'mar ñeñt̃ añcha'tarettetsa arr patsropa' añ torrenet ñeñt̃ atet muenatenanet Yompor, allochñapa' attoch a'pocatenet esheccha' e'ñe cohuen yocrrena arr patsro. Tarraña ñerra'm añ atet sepen ñeñt̃ ama cohuenayayepa' pocte'ñächo'ña allochñapa' attoch semcha'teñ añcha'taret̃, tarro'mar ñapa' ama orrena añcha'taretteno, chocmach tsa'tatana ñeñt̃ at̃pare'tene'. Tarro'mar ñapa' Yompor muenatene' ñapa' ñach tsa'tatenaya allohuen ñeñt̃ atet pene' ñeñt̃ ama cohuenayaye.

5 Ñeñto'marña añ pocte' o'ch yame'ñya ñeñt̃ añcha'tarettetsa arr patsro, allochñapa' attoch amach tsa'taterrye Yompor e'ñe ya yatparñoť. Elloña ñeñt̃ atet yame'ñena, tarro'mar e'ñe yeyochropa' yeñotena ñeñt̃pa' e'ñe pocte' o'ch e'ñe yame'ñena.

6 Ñeñto'marña ñaña añ pocetsa o'ch yetsa'ta impuesto, ñeñt̃ atet anaret̃ ñoñets ñeñt̃ cobrenyet añcha'taret̃eshoť tarro'mar ñeñt̃ añcha'taret̃etyetsa añ patsro, ñeñt̃pa' atet muenatenanet Yompor ñeñt̃cha' atet torrenet ñeñt̃ po'taruas penet.

7 Chocmach setsa'ta allohuen ñeñt̃ atet anaret̃ ñoñets at̃to cobrenyet atet ñerra'm allpon quelle ñeñt̃ enamueney añcha'taret̃nesha' atet ñerra'm impuestočno, chocmach setsa'cha. Ñaña acheñ ñeñt̃ añcha'na'tpo' entenetpa' chocmuepa'ch semcha'na'tueñ. Ñaña acheñ ñeñt̃ atarr amorrentaret̃apa' chocmuepa'ch semorrentueña.

8 Amach esesha' seteñatsto, ama't puesheñarra. Añcha'ña sepa ñeñt̃ pocetsa socop, o'ch semor-

reñcha samo'ts. Tarro'mar ñerra'm e'ñe yemorrenteña yamo'tspa' attochña yetsotua ora Yompor po'ñoñ ñeñt atet anaret ñeñtcha' atet yepenamet e'ñe cohuen.

<sup>9</sup> Atet ñerra'm pa'terr ñoñets ñeñt atet anaret ñeñtpa' atet oten: "Amach sechtapretanna'tatsto setapor." Po'poñ ñoñetspa' ñeñtpa' atet oten: "Amach semtsanna'tatsto." Po'poñpa' atet oten: "Amach setyesatsto"; po'poñpa' atet oten: "Amach setoma'tam̄psatsche samo'ts." Po'poñpa' atet oten: "Amach seye'chapretanna'tatsto", ñaña eñall po'poñechno ñoñets ñeñt atet yechateney. Allohuen añ ñoñets ama't po'poñe'ttsohma atet yechateneyñ, tarraña po'ñoçhpa' e'ñe patrra oteney, ñeñtpa' atet oteney: "Atarrepa'chña yemorrenteña yamo'ts e'ñe atet atarr yemorrentena yañeña." Ñerra'm çhocma yemorrenteña yamo'tspa' allempoña po'ñoçhpa' yetsotuach ora allohuen ñeñt atet yechatyeny po'poñe'ttsohma ñoñets ñeñt atet anaret.

<sup>10</sup> Tarro'mar ñerra'm po'ñoçh çhocma yemorrenteña yamo'tspa' amach yemno o'ch erro't yeñanet te't cha yellcatenamet. Añechno atetpa' ama morrenteñtsoyaye. Ñeñto'marña yeñoteñ ñerra'm po'ñoçh çhocma yemorrenteña yamo'tspa' ñeñtpa' attochña e'ñe yetsotua ora allohuen ñoñets ñeñt atet anaret ahua'toteñ Yomporeshot.

<sup>11</sup> Atetcha' sepo'hua ñeñt atet o' notuas, tarro'mar yeñoteñ o' çhappoch allempoch huerra Cristo, ñeñto'mar socoppa' añ poctetsa o'ch alla setanterra Cristocop amachña seçllañoña es

sepa'yeno atet ñerra'm čha semuen. Tarro'mar ahuañmo'cha allempo ñanom yame'ñera Cristopa' allempo atarr atomat palltenmeñ attoch ya'queshpataretterra. Tarraña te'pa' ama atarr atomatmeñeyaye. O' mameshamerra attoch ya'queshpataretterra.

<sup>12</sup> Arr patsropa' eñall shonte' sosya'tsañečno. Ñato' o'ch yetma'ntacha atet ñerra'mrrate' yapa' checmeta yeyčhena. Tarraña te'pa' e'ñe atet pena ñerra'mrrate' o' metuamoch checmete' o' puetarenmoch, tarro'mar yapa' yeñoteñ o' čhappmoch allempoch huerra Cristo. Ñeñto'marña añ poctetsa o'ch yesuanom allohuen ñeñt ama cohuenayaye ñeñt atet atma'ntataret checmete'. Añcha'ña atet ye'pa'yen ñeñt cohuen enten Yompor ñeñt atet atma'ntataret puetare'. Attochña yetorrena Yomporecop atet ñerra'mrrate' čho yečllarena ñocop.

<sup>13</sup> Añepa'chña ye'pa'yen cohuen ñeñt atet penet yeto, ñeñt ama apencočhenayaye ñeñtpa' ama atteyaye ñerra'm ñeñt atet penet tsapo. Amach yoctapretatsto all nanac coshena aposañe'čhno, e'ñe porrare'teñoťet all atarr pa'namen coshatse'tyenet. Ñaña amach yechta'yestatsto coyanešachno, amach atet ye'patsto ñeñt pa'namen sosya'tsañečno. Amach ye'natsto atsrre'močhen, ñaña amach ye'moñe'tanna'tatsto e'ñe yesope'cheñoť.

<sup>14</sup> Añcha'ña ahua-mencať sepene' Yepartseshar Jesucristo, allochñapa' attoch amach semnatatsto sechets o'ch muenatse'tatas ñeñt ama cohuenayaye.

## 14

*Atto eñall ñeñt epuoye' ame'ñenayañ Cristo tarro'mar ama huomencaye' penano pueyoçher Yomporecop*

<sup>1</sup> Ñaña te'pa' o'ch notas po'poñ ñeñtcha' atet sepa. Ñerra'm eñall sesho acheñ ñeñt ame'ñetsañ tarraña ñapa' ama huomencaye' penano pueyoçher Yomporecop tarro'mar ama e'ñe eñoteñe po'ñoçh atet yeyemteña Cristo, sañapa' o'ch sagaḗ e'ñe cohuen attochña e'ñech parrocmá seyemteña Cristo. Tarraña amach añecpa sagape attoch sapa' o'ch sotnare'ch tarro'mar ñapa' po'poñonet cotape'chyen.

<sup>2</sup> Atet ñato' eñall acheñ ñeñt ama huomencaye' penano pueyoçher Yomporecop tarro'mar ama e'ñe eñoteñe ñeñt atet po'ñoçh yeyemteña Cristo; ñeñto'marña ñapa' çhach oten ama pocteyaye o'ch yerra'yes berr po'chets, añach pa'terr yerren narmetsoçhno. Elloña po'psheññeçhno e'ñe pueyemteño'tet Cristo ñetñapa' otenet e'ñe pocte' o'ch yerra'yes ama't erra'tsena rreñets.

<sup>3</sup> Ñeñtey pa'namen es rra'yetspa' amuepa'ch yentatsche ñeñt tore'tetsa ñapa' ama es eñoto. Ñaña ñeñt es tore'tetsapa' amuepa'ch otatsetye ya ñeñtey pa'namen es rra'yets ama pocteyaye o'ch yerrats'e'tyes pa'namen ñeñt ama arrapahuoyaye. Tarro'mar Yomporpa' ñaña o' aguërrey attoch pueyochresha' perrey.

<sup>4</sup> Ñeñto'marña yapa' yeñoteñ ama pocteyaye o'ch yotanna'tena e'ñe yagattsa Yompor pueyochresha'pa' ama pocteyaye ñeñt atet

penet. Tarro'mar ñetpa' Ayochreshatecpuet tarro'mar ñapa' ñaña ñapueñ otets atto pocte' entenan pueyochresha' amapa' ñerra'm ama pocteye' entenano pueyochresha'. Ñaña Ayochreshat Cristopa' chocmach e'ñe pocte' entenan pueyochresha' tarro'mar ñapa' ñach ahuaencat pahuet pueyochro.

<sup>5</sup> Ñaña ñato' eñall achen ñeññ ama e'ñe eñotenaye ñeññ atet e'ñe po'ñoçh yeyemteña Cristo, ñeñño'marña ñetpa' cha otenet añ poctetsa o'ch yonañcha'yen pate'tets yet ñeññcha' atet yetsotayes attochña e'ñe pocte' enteney Yompor. Ñaña ñato' po'psheññechno ñeññ atet ñerra'm yapa' otenet ama yepallteno o'ch yonañcha'yen pate'tets yet ñeññcha' atet yetsotayes tarro'mar allpon yetpa' Yomporecma pueyeçhcatuar. Tarraña puesheña'ttsoypa' yeñoche'pa'ch ñeññ e'ñe pocte' yentyen ya e'ñe yeyoçhro ñeññcha' atet ye'pa.

<sup>6</sup> Tarro'mar ñerra'm esesha' onañcha'yene' yet ñeññcha' atet etsotayes, ñapa' atet oten ñeññpa' atet yame'ñeña ya Yompor. Attecma yepena yaña ñeññey ama onañcha'yenaye yet, yapa'cho'ña atet yame'ñeña Yompor. Ñaña ñeññey pa'namen es rra'yetspa' yapa'cho'ña atet yame'ñeña Yompor, tarro'mar yeparasyoso'teñesha' Yompor es yerra'yen. Attecma pena ñaña ñeññ es tore'tetsa, ñetpa'cho'ña atet ame'ñeñet Yompor ñaña ñetpa' e'ñe pueparasyoso'teñeshet Yompor es tore'tyenet.

<sup>7</sup> Tarro'mar ama e'ñe ya yemneññote'ye' atet es ye'pa'yeno añe patsro. Atto yocrrena añe patsropa' ñeññpa' ama e'ñe yaptecpayaye, ñaña allempoch



yerromapa' ñeñtpa'cho'ña ama yemneññoŕeyey' yerromueno.

<sup>8</sup> Tarro'mar atto yocrrena allponmat aña patsro ñeñtpa' añecop attoch yesherbeñ Yepartseshar. Ñaña allempo yerromuenpa' ñeñtpa' tarro'mar atet muenateney Yepartseshar. Ñeñto'marña yapa' yoten allempo yocrrena aña patsro ñeñtpa' ama yaptecpaye' yocrreno, ñeñtpa' Yepartsesharecop. Ñaña allempo yerromuen, ñeñtpa'cho'ña ama yaptecpayaye, ñeñtpa'cho'ña Yepartsesharecop. Ñeñto'marña ñeñtpa' chocma atet pena tarro'mar ñapa' e'ñe o'paterrya ñaña e'ñe ñocpay.

<sup>9</sup> Tarro'mar Cristopa' ñeñtecop rroma, elloñapa' alla correrra attochña ñapa' ñach yamo'mte' yepen allohueney. Ama't allempo yocrrenmeñ, ama't ñaña allempo yerromuen, atterach yamo'mte' yepeñ, tarro'mar ñapa' pueñotuaran atet peney rromueñets ñaña atto yocrrena ñeñtey arromñaŕey.

<sup>10</sup> Ñeñto'marña amach yotatsche yemo'nasheñ ñeñt atet pena ñapa' ñeñtpa' ama pocteyaye. Ñaña amach yotatsche ñapa' ama es eñoteno. Tarro'mar Cristo ñapa' ñach yoterre' errotench'a' entyerrey esempohuañen allempoch yapcherra allohueney ñesho.

<sup>11</sup> Tarro'mar Yompör po'ñoñ ñeñt anuaret ahuatoteña' ñeñt allpa' Yompör otatset atet:

Napa' na ñeñten ama arromñaŕeshayayno ñaña ama puenesho neñoñ. Po'ñoçhpa' atetcha' perra esempohuañen. Ora allohuen acheñenesha'pa' concorpanrrorterrnetcha'. Allña'pa' otuerrnetcha': "Pa Yomporep

ñeñteḗ atarr Partsoḗ.”

12 Attoña yeñoteñ allohueneḗ puesheña'ttsoy Yomporpa' a'metataterreycha' ñeñt atet o' yeḗpohuahena arr patsro.

*Atto ama pocteyaye e'ñe atet yepeñoḗ ya o'ch alla ya'puerratater yemo'nasheñ*

13 Ñeñto'mar ama pocteyaye o'ch yañeña yotanna'ta ñeñt atet yentannena arr patsro. Añcha'ña yañeña e'ñech yeñotena ñeñt atet yeḗpa'yena ya tarro'mar ñeñt atet yeḗpa'yena yapa' ñato'rraña ḗchate' ya'puerratater yemo'nasheñ ñerra'm ñapa' ama pocteye' entenano ñeñt atet yeḗpa'yen ya.

14 Napa' e'ñe neyemteñoḗ Yepartseshar Jesús neñoteñ e'ñe pocte' o'ch es yerra'yes tarro'mar neñoten allohuen rreñetspa' e'ñe arrapahuocma Yomporecop. Tarraña ñerra'm esesha' ama arrapahuoye' entenaye ñeñt allohuen rreñetspa' e'ñe ñocoppa' ama pocteyaye o'ch rrenan ñeñt rreñets.

15 Ama't e'ñe pocteyaye o'ch yerra'yes, tarraña ñerra'm yemo'nasheñpa' ama arrapahuoye' enteñe, yapa' e'ñe ya yerreñoḗpa' ñato' o'ch yeye'chateña allempoñapa' o'ch rre' ñaña, ñaña'ña ḗchach enteñ ñeñt'pa' ochña'teñets Yomporecop. Atteñapa' ñato' o'ch alla puesuerran Yompor. Ñato' yerreñoḗ ama't e'ñe cohueña'pa' o'te' yequeḗpatater yemo'nasheñ Yompor. Ñeñto'marña notenes, amach yerratsto allempo, te't ñeñto'mara yequeḗpatater yemo'nasheñ Yompor. Ñaña ñerra'm atet yepeñ yemo'nasheñpa'

po'ñoçhpa' ama yemorrenteño, ñeñtara yemo'nasheñer ama't Cristopa' ñocpa'na rroma.

16 Ñeñto'marña notenes, ama't pocteyñ ñeñt atet peña'yena, tarraña ñerra'm yemo'nasheñpa' ama pocteye' enteñe, ñañaapa' ñeñtofach sasare'teney. Ñehua, ama't e'ñe pocteyñ o'ch atet yepenañ, tarraña amach atet yeḡatsche.

17 Tarro'mar ñerra'm añ yocteyñañ Yompor po'cohuenña atto pueyochresha' peney, ñeñt atto es yerra'yen amapa' atto es yetore'tyena, ñeñtpa' ama esoyayeña Yomporecop. Añña ñeñt nanac sherbets attoch yocteyñañ Yompor po'cohuenña, ñeñtpa' atto e'ñe pocte' es yeḡannena añe patsro, ñaña atto e'ñe cohuen yentannena attochña yocrena e'ñe cohuen muechet, ñaña attochña Parets Puecamquēñpa' çhocmach coshateney yeyoçhro.

18 Ñerra'm atetcha' yame'ñeña Cristo, Pomporñaapa' e'ñech cohuen enteney, ama't allohuen acheñenesha'pa'çho'ña e'ñech cohuen enteneyet.

19 Ñeñto'marña napa' notenes, añeapa'chña ye'nen ñeñt attoch e'ñe yeparrocmaterr allohueney ñaña attochña e'ñe cohuen yeyenpanna. Allochñaapa' allo'nach e'ñe huomenc yeḡanna'tnena yeyoçher Yomporecop.

20 E'ñe ya yerreñoḡ po'çhetspa' amach ya'huañatatsterrñañe po'psheñeñ ñeñt atet ame'ñenanañ Yompor. Ama't allohuen rreñtsoçhno cohuenacmañ ñeñtcha' yerra'yeneñ, tarraña ñerra'm yerreñoḡ o'ch alla ya'puerratater po'psheñeñ attoch o'huañcha' ame'ñenana Cristo, ñeñtepñaapa' e'ñe pocte' amach yerratsto ñeñtcha'

a'puerrataterre' po'psheñeñ, tarro'mar atetpa' ama cohuenaye' enteñe Yompor.

21 Ñeñto'marña notenes, ama't erra'tsena ñeñt atet yepeñoť po'psheñeñpa' o'ch alla ya'puerratater, ñeñtepnapa' amach atet yepatsto, allochñapa' amach puerrerro ama't puesheñarra ñeñt ame'ñenaya Cristo. Atet ñerra'm allempo yerren berr po'chets ñaña allempo yorren co'nes,\* ñerra'm atet yepeñoť o'ch alla ya'puerratater yemo'nasheñ, ñeñtepnapa' añ poctetsa amach yerratsto berr po'chets, amach yorratsto ñaña co'nes, tarro'mar allempopa' ama cohuenaye' enteñe Yompor.

22 Ñerra'm e'ñe pame'ñeñoť Yompor peñotena ñeñt atet pepa'yena ñeñtpa' e'ñe pocte' entapreteneņ Yompor, tarraña papa' e'ñech peyočhro poctape'cheñ Yompor atet, amachña čha pe'matare'tatstoña allo. Nanac cosheñtso'tseney ñerra'm yeñotena po'ñočh e'ñe pocte' entapreteney Yompor ñeñt atet es yepa'yen, tarro'mar yeyočhropa' ama epuoye' es yepa'yeno.

23 Tarraña ñerra'm esesha' ñeñt epuoye' es rra'yenpa' ñocoppa' ama pocteyaye o'ch rren, ñañaapa' ñeñtaña po'chñar pen. Tarro'mar ama pueñmañeshocmañenaye' es rreno, ñaña yapa' yeñoteñ ñerra'm ama yeñmañeshocmañenaye' es yepa'yeno, ñeñtpa' ñeñta yo'chñar entennay Yompor.

## 15

---

\* **14:21** Ñehua, Pablo añ toma'ntatanet vino ñeñt poco'nes penet all pa'nyo.

*Atto añcha'ña ye'nen ñeñt e'ñe pocte' enten yemo'nasheñ*

<sup>1</sup> Ñeñto'marña napa' notenes, ñeñtey e'ñe huomenc pene' yeyoçher Yomporecop, ñeñtey ama epuoye' yame'ñeño Yompor, añña poctetsa o'ch yeyenpueñ yemo'nasheñ ñeñt ama huomencaye' penaye pueyoçher Yomporecop ñeñt çhocma epuoye' ame'ñenana Yompor. Ñeñtpa' atetcha' yeyenpueñ, amachña añña atet es yeþa'yeno ñeñt atet yemnen ya.

<sup>2</sup> Añcha'ña ye'nen o'ch atet yepen ñeñt e'ñe pocte' enten yemo'nasheñ. Ñeñtpa' atetcha' yeyenpueñ allochñapa' o'ch e'ñe huomenc þa'nman ñaña pueyoçher Yomporecop, allochñapa' amach allo'na epuoye' ame'ñenano Yompor.

<sup>3</sup> Amach añña atet es yeþa'yeno ñeñt atet yemnen ya tarro'mar Cristopa' ama añña atet þa'yese'te ñeñt atet muene't e'ñe ñañeña. Añña þa'yese't ñeñt muenache't Pompor. Tarro'mar ñapa' ñeñtecopña mueroçhte't ñeñt atet muenache't Pompor. Ñeñto'marña Cristopa' atet otane't Pompor, ñeñtpa' atet och: "Pa e'moñe'tetañpa' attoña sasare'tennet." Attoña e'ñe etsoterra ñoñets ñeñt atet aquellca'huaret ama't ahuatoteñ.

<sup>4</sup> Ñaña allohuen añ ñoñets ñeñt atet aquellca'huaret ahuatoteñ, ñeñtpa' yocpa'ñaña atet anaret. Allochñapa' attoch yapa'cho'ña o'ch yeçhaterryet ñeñt atet muenen Yompor. Allochñapa' attochña huomenc yepen yeyoçher Yomporecop. Ñaña añ ñoñets ñeñt atet aquellca'huaret ahuatoteñpa' nanaccha' coshaterrey allochñapa' attotcha'ña e'ñe

yocsheñesha' yeyemteññaña Yompor ñeñt  
o'patatenya.

<sup>5</sup> Yompor ñapa' ñeñt ahuamencat yepene'  
ñaña ñapa' ñeñtña yocshatene' yeyochro. Ñaña  
ñepa'chña e'ñe seño taterre', allochñapa' attoch e'ñe  
cohuen seyçherr ñeñt atet muenen Cristo Jesús,  
allochñapa' e'ñech cohuen sentannena.

<sup>6</sup> Allochñapa' allohuenespa' e'ñech parrocm  
sa'ye'chochtateññañ Yompor; ñeñtara Yepartse-  
shar Jesucristo Pompor.

*Atto ama't ñeñt ama judioneshayayepa' ahuo't  
aserrpare'tatarettet añ cohuen ñoñets alloch  
yequeshperra*

<sup>7</sup> Ñeñto'marña napa' notenes, e'ñech cohuen es  
señanna'tyena allohuenes e'ñe atet cohuen o' per-  
rey Cristo, allochñapa' attoch seyemteñoť parro  
cohuencha' sa'cshapretarettena Yompor.

<sup>8</sup> Ñaña te'pa' o'ch notas, Cristopa' ahuo't  
huapa arr patsro attoch torrosa judioneshacop.  
Allochñapa' attoch allohuen acheñenesha'pa'  
o'ch çhapanet pueyoçhreto, Yomporpa' ama  
puenesho po'ñoñ. Ñeñt e'ñe atet otane't  
judionesha' pa'tañneshañ ahuaťpa' ñeñtcha' atet  
muenaterranet esempo, ñeñt'pa' çhocmachña e'ñe  
etsoterra poctacma.

<sup>9</sup> Ñeñtecopña huapa ñaña attochña acheñenesha'  
ñeñt ama judioneshayaye ñetpa'cho'ña o'ch  
aye'chochtatoñet ñamet Yompor tarro'mar  
Yomporpa' ahuo't muerenanet ñamet. Attoña  
etsoterra ñoñets ñeñt quellca'huet ahuať atet  
ñerra'mrrate' e'ñe Cristo ote' Pompor, ñeñt'pa' atet  
ot:

Ñeñto'marña napa' o'ch na'ye'chochtatonap  
allo'tsa'yen acheñenesha' ñeñt ama  
judioneshayaye, allñapa' na'çhoteneþcha'  
nemorreñesha'.

10 Ñaña po'poñ ñoñets ñeñt atet aquellca'huaret  
ahuatoteñ, ñeñtpa' atet oten:

Ñaña sa ñeñtes po'poñ acheñes ñeñtes ama ju-  
dioneshayaysopa' socshepa'ch saña, atet  
coshena judionesha' ñeñt pueyochresha'  
pen Yompor.

11 Ñaña po'poñ ñoñets ñeñtpa' atet oten:

Ñeñtes ama judioneshayaysopa'  
sa'ye'chochtatoñepa'ch Yompor,  
ama't allohuenes pa'namen acheñres  
sa'ye'chochtatoñepa'ch Yompor.

12 Elloña Isaíaspa'çho'ña atet ote't ahuat:

Esempopa' orrterrach puesheñarr ñeñt Isai\*  
po'mreneñ. Ñapa' orrterrach allochñapa'  
ñeñtcha' pa'mcha'tareter perr allohuen  
pa'namen acheñenesha', ñaña allohuenet  
ñachña atarr yemterret. Arrpa' allohua  
ñeñt atet a'potete't Cristo ahuat.

13 Yomporpa' ñachña atarr ayemuetpoterrtsa.  
Ñaña ñepa'chña socshatene' e'ñe poctacma.  
Allochñapa' amach eñalle ama't coñe'ta ñeñtcha'  
sellcatene' atto same'ñeña ña. Allochñapa'  
Paretsña Puecamquëñpa' ñachña ahuamencat  
sepene'. Attochña e'ñech socsheñesha' secuen ñeñt  
o'patatensa Yompor.

\* 15:12 Isaípa' ñeñfara Jesé. Ñehua, ñapa' ñeñt puechemeran David  
ñeñt amcha'tarettatse't Jerusaléño.

*Atto Pablopa' ahuo't llesenseñ Jesucristo attoch amach puenicha'ñoŕeye' alla yerpaterraneto ñeñt e'ñe pocte' enten Yompor*

14 Ñaña te'pa' o'ch masheñnesha ñaña nočhanesha notas, napa' neñotenes sapa' atarr semorrentannena ñaña neñotenes o' e'ñe čhaponasa seyočhro ñeñt atet muenatenes Yompor. Allochñapa' attochña e'ñe cohuen soctape'chatannena erra'tsente' cohuentetsa Yomporecop.

15 Tarraña ama't atetpa' ama nemichañoŕeye' o' notuanmaso pa'namen arr necartoť ñeñt atet pocte' enten Yompor. Attoña o' alla neyerpaterrser ñeñt atet muenen Yompor. Ñeñto'marña atet nepenes, tarro'mar e'ñe Yompor puemuereñoŕenpa'

16 ahuo't muenatenen nach torretsa Jesucristocop. Erracmañen allemeñ anetso'mar netorrena, allo'tsa'yen acheñenesha' ñeñt ama judioneshayaye. Napa' na a'poŕenahuet Yompor po'ñoñ ñeñt po'ñočh alloch yequeshperra. O'ch name'ñatuera ñeñt ama judioneshayaye, allempoñapa' attochña nehuapat Janet Yomporešo atet ñerra'mrrate' čho es yapueñ Yompor, ñañapa' ñeñtcha'ña atarr coshatene'. Alloñapa' Paretsña Puecamquēññapa' ñachña a'cohuentatuerrahuet. Attochña e'ñe cohuen enteñet Yompor.

17 Ñeñto'marña te'pa' e'ñe neyemteñoť Cristopa' e'ñe pocte' nenteñ o'ch e'ñe nocsheña ñeñt allo netorrena Yomporecop.

18 Napa' aña paŕerr noten atto Cristopa'



e'ñe ahuamencat penen, ñeñto'marña chocma name'ñateña ama't ñeñt ama judioneshayaye. Atto neserrpare'tatanet Yompor po'ñoñ, ñetñapa' ahuo't e'ñe name'ñatuanet. Ñaña atto napa' e'ñe cohuenare' es norrtatyen, ñetñapa' ahuo't e'ñe cohuen ame'ñeñet Yompor.

19 Ñaña ñetpa' añña ame'ñatahuet ñeñt atto e'ñe ahuamencat penen Cristo attoña norrtatanet Yompor po'partsoña ñeñt ama puentareto. Ñetpa' ñeñtña eñotatuahuet, ñeñtpa' po'ñoñ e'ñe Parets Puecamquëñoñ ñeñt e'ñe ahuamencat yepene'. Atteñapa' ora erracmañen o' neserrpare'tua añ cohuen ñoñets atto e'ñe yame'ñeñoñ Cristopa' o'ch yequeshperra. Ateña neserrpare'tyesnom allemeñ anetso'mar e'ñe Jerusaléñoñeñ Ilírico'marohuen.

20 Napa' añña atarr nemnen o'ch neserrpare'tyen añ cohuen ñoñets erraparen baçhayo'mar all ama pue'mareto ñeñt Cristotets. Attochña napa' amach arra neseno serrpare'tats all o' serrpare'tatuahua po'psheñeñ.

21 Attochña etsoterra añ ñoñets ñeñt atet aque-llica'huareñ ahuañoten, ñeñtpa' atet oten Cristocop: Acheñenesha' ñeñt ama't ahuañapa' ama aserrpare'tatareñteneto ñeñt atet pena ña, ñetñapa' enteretcha'. Ñeñtara acheñer ñeñt ama pue'marano ñeñt atet pena ña, ñetñapa' çherranetcha' pueyoçhreto ñeñt atet pena ña.

*Atto Pablopa' atarr sechena o'ch ahuo' anetso Romo o'ch emo'tenana' ñeñt ame'ñetsa all*

22 Napa' shonte' neserrpare'tatyen erracmañen arr, ñeñto'marña ama eshcaye' neseno sesho. Ama't ahuañoteñ atarr nesechenañ o'ch nabchensa', ama erroť nepeñe.

23 Tarraña na te'pa' o' ne'nua netaruas ñeñť atto neserrpare'tyen arro'mar allemeña. Ñaña napa' ahuaťoteñ nesechena o'ch nabchensa'.

24 Ñeñto'marña te'pa' e'ñe po'ñočh nesechena o'ch ahuen sesho o'ch nabchensa'. Allochñapa' o'ch yabchanna'ta allponmat, allempoñapa' ñato' attoťpa' o'ch seyenpa'n attoch nečhap ñaña España.

25 Ñehua, te'pa' ñanomcha' Jerusaléño neta, attoch nanmanet allpon ofrenda masheñeshacop ñeñť ame'ñetsa all.

26 Tarro'mar allpon ñeñť ame'ñetsa Macedonio ñaña Acayo, ñetpa' e'ñe pocte' enteñet o'ch apuet allpon ofrenda, ñeñťcha' oñmachtet masheñesha' Jerusaléño ñeñť nanac es pallta'yenet.

27 Macedonio'marnesha' ñaña Acayo'marnesha' ñetpa' ama judioneshayayeto. Tarraña e'ñe pocte' enteñet o'ch yenpueñet judionesha' ñeñť Jerusaléño'tsa'yen ñeñť nanac es pallta'yenet. Napa'čho'ña e'ñe pocte' nenteñ tarro'marña ñeñť judionesha' ñetpa' ñetña serrpare'taterret ñanom ñeñť ama judioneshayaye Yompor po'ñoñ. Ñeñť atet apareťtet ñetpa' ñeñťpa' puecamquëñecop. Ñeñto'marña te'pa' e'ñe pocte', ñeñť ama judioneshayayepa' o'ch alla yenpuerran ñaña ñeñť judionesha' ñeñť poctetsa po'chtsocpuet alloch correnet arr patsro.

28 Allempoch nečhap Jerusaléño o'ch napos

masheñnesha' ofrenda. O'ch naphuerranet attochña e'ñe ne'nua ñeñt netaruas nepen. Allempoñapa' o'ch ahuen ñaña Español. Ñehua, amach ne'chena' Españolpa' o'ch nemo'tnomues allponmat, allotcha' nem'terrerr seshotpa' allempochña o'ch ahuen Español.

<sup>29</sup> Ñaña neñoteñ ñerra'm esempoch ne'chap sesho e'ñe neserrpare'tateño'tes Cristo po'ñoñ, sapa' nanaccha' nocshatterres e'ñe nanac Yompor pa'nateño't.

<sup>30</sup> Ñaña te'pa' o'ch masheñnesha notas, e'ñe seyemteño't Yepartseshar Jesucristo, ñaña attoch apueney Parets Puecamquëñ alloch e'ñe yemor-rentannena, sapa' 'chocmach sema'yocham'pesna. Nanaccha' sema'yochapretna,

<sup>31</sup> o'ch senamaton Yompor attoch cohuan'psen allochñapa' amach 'cha rromapno judionesha' ñeñt ama'ñetso all Judeo. Ñaña o'ch senamaton Yompor añecop judionesha' ñeñt ame'ñetsa Jerusaléño, attoch e'ñe cohuen entapretapnet ñeñt'cha' naposanet.

<sup>32</sup> Allochñapa' ñerra'm Yompor muenatspa' e'ñech nocsheñnesha' ne'chap sesho. Allñapa' namesoste' e'ñe cohuen allponmat, ñaña e'ñe yab'channa'teño'tpa' o'te' alla e'ñe nocsherra neyo'chro.

<sup>33</sup> Yomppurepa'chña e'ñe cohuen sa'nataya allo-huenes, ñeñtara Yompor ñeñt e'ñe cohuen yocshatene' yeyo'chro. Ñeñt'pa' attetepa'ch Nompore.

*Atto Pablo arr po'cartotpa' e'ñe huom̃cha'tuan ora allohuen ñeñt ame'ñenaya Cristo all anetso Romo*

<sup>1</sup> Ñaña te'pa' añ necartotpa' nemneñ o'ch neñotatas ñeñt yoçh yepen ya arr ñeñtpa' añ pa'so'cheñ Febe. Ñapa' ña sherbets Yompor pa'paclo allecma apçhenet Yomporecop añ anetso Cencreo.

<sup>2</sup> Ñapa' mueneñ ahuo'ch ahuo' sesho. Ñerra'm esempo çhap seshopa' o'ch sagaḡ cohuen, ñeñt atet poctetsa o'ch yagapannena e'ñe cohuen, ñeñtey ame'ñenaya Yepartseshar Cristo. Ñaña ñerra'm o'ch çhap sesho, ñerra'm escha' palltosa ama't erra'tsena, añ poctetsa sapa' o'ch seyempueñ tarro'mar ñapa' atarr cohuen ayenpañ; ama't napa' nanac yenpuenen.

<sup>3</sup> Napa' nemneñ añ necartot o'ch nehuom̃cha'ch noçh Priscila puerrollare'na ñeñtara masheñ Aquila, ñeñt parro netorrena ahuañmo'cha Cristo Jesúsocop.

<sup>4</sup> Ñetpa' nanac yenpuennet ahuañmo'cha allempo muene' muetsanetañ. Ñetñapa' autsa rromatsetañ attot a'quesḡpatnet na allempo muene' muetsaneñ ñeñt ne'moñe'tene'. Ñeñto'marña napa' atarr neparasyoso'tenanet ñaña ama naptayaya añña ñaña ñeñt allohuen ñeñt ama judioneshayaye, ñeñt e'ñe pame'ñeñotet apçha'yenet allemeñ anetso'mar, ñetpa'çho'ña atarr parasyoso'teñet noçh Priscila ñaña masheñ Aquila, tarro'mar ñetpa' ahuo't a'quesḡpatnet, attot ellopa' o' alla neserrpare'tatererr ñeñt ama judioneshayaye.

5 Ñaña te'pa' o'ch nehuom'cha'ch allohuen masheñnesha' ñeñt̃ pame'ñeñoŋet čhocma ap'chenet masheñ Aquila pa'paclo, all yečhena epuet puetapor Priscila. Ñaña arr necartotpa' nemneñ o'ch nehuom'cha'ch masheñ Epeneto ñeñt̃ nanac nemorrentena. Ñapa' ña ñanom ame'ñenaya Cristo all anetso Acayo.

6 Allotpa' o'ch nehuom'cha'ch ñaña nočh María ñeñt̃ nanac torretsa sesho parro.

7 Te'ñapa' o'ch nehuom'cha'ch ñaña namo'ts ñeñt̃ara masheñ Andrónico ñaña masheñ Junias, tarro'mar ñet ahuañmo'chapa' ñeñt̃ parro ehuan-caretey. Ñetpa' ama't allsensareñnesha'pa' nanac asherben entarettet, tarro'mar ñetpa' ahuaŋoteñ ame'ñeret Cristo. Ama't allempo napa' ama name'ñena' ñetñapa' o' ame'ña'huet ñanom.

8 Allotpa' nemneñ o'ch nehuom'cha'ch ñaña masheñ Amplias ñeñt̃ atarr nemuerena e'ñe yame'ñeñoŋ Yepartseshar parro.

9 Allotpa' ñaña masheñ Urbano, o'ch nehuom'cha'ch ñaña ñeñt̃ parro yetorrena ñeñt̃ po'taruas pen Cristo Jesús. Allotpa' e'ñe nemorrenteñoŋtpa' o'ch nehuom'cha'ch ñaña masheñ Estaquis.

10 O'ch nehuom'cha'ch ñaña masheñ Apeles ñeñt̃ čhocma ahuantene' allohuen pa'namen topateñets attoña e'ñe cohuen coťenan Cristo. Allotpa' ñaña o'ch nehuom'cha'ch allohuen ñeñt̃ pamo'ts pen Aristóbulo.

11 Allotpa' ñaña namo'ts Herodión, allotpa' ñaña ñeñt̃ pamo'tsesha' pen Narciso. Ñetpa' atarr ame'ñeñet Yepartseshar.

12 Te'ñapa' nemneñ o'ch nehuom̃cha'ch ñaña no'ch Trifena ñaña no'ch Trifosa. Ñetñapa' nanac torreññañet Yepartseshar po'taruas, allo'pa' no'ch Pérsida ñapa'cho'ña nanac yemorrenteña atto nanac torrena ñaña Yepartsesharecop.

13 Ñaña arrpa' o'ch nehuom̃cha'ch ñaña po'psheñeñ masheñ Rufo ñeñt̃ pame'ñeño' nanac asherben yenteñ Yepartsesharecop. Ñaña pachore'na o'ch nehuom̃cha'ch, tarro'mar ñapa' e'ñe atet nenteñ ñerra'mrrate' ñeñt̃ e'ñe nachor nepen.

14 Te'ñapa' o'ch nehuom̃cha'tererr po'potantañ masheñnesha' ñeñt̃ añ Asíncrito, ñaña Flegonte ñaña Hermas, ñaña Patrobas, allo'pa' ñaña Hermes, ñaña po'potantañ masheñnesha' ñeñt̃ parrompañ'o'tsa'yenet.

15 Te'pa' o'ch alla nehuom̃cha'tererr ñeñt̃ masheñ Filólogo ñaña no'ch Julia, allo'pa' ñaña masheñ Nereo epuet ñaña po'ch, allo'pa' ñaña Olimpas, ñaña ama't allohuenet masheñnesha' ñeñt̃ parrompañ'o'tsa'yenet.

16 E'ñe semorrentanna'teño'pa' atetcha' sehuom̃cha'tanna'tena\* ñeñt̃ atet poctetsa Partsocop. Ñaña allohuenet masheñnesha' ñeñt̃ ap'cha'yetsset allemeñ anetso'mar e'ñe pame'ñeño'fet Cristo, ñetpa'cho'ña mueneñet o'ch huom̃cha'taset ñaña arr necarto'.

*Atto Pablo arr po'carto'pa' o' alla cotape'chaterraneterr po'pocheño*

\* **16:16** Po'ño'ch oteneý, "E'ñe semorrentanna'teño'f choch setso'ttsa'pa'tannena ñerra'm esempo sehuom̃cha'tanna'tena." Ñeñpa' atet ye'chete' t̃ ahuat̃.

17 O'ch masheñneshacha' ñaña nochaneshacha' noterrerr po'poñ añ necartot. Señotcha' añ acheñeneshar ñeññ muenene' o'ch ellopa'tetstatonaset soctapña ñeññ atto same'ñeña Cristo, tarro'mar ñetpa' mueneñet o'ch cotape'chataset ñeññ ama atteyaye ñeññ atet o' yeychatuas. Ñeññ acheñer atetpa' o'ch sellot'sentach seshot, amach seyemtatstaneto ñeññ atet yechatenet.

18 Tarro'mar ñetpa' ama añeye' sherbeneto Yepartseshar Jesucristo. Aña cotape'chenet ñeññ atet muenenet ñet po'chets atto correnet. Atto serrpare'tenet cochnesha' ñoñets, ñeññpa' atta shequēñet acheñenesha' ñeññ ama huomencaye' penaye pueyocher.

19 Ñehua, allohueney yeñotenes sapa' o' same'ñera Cristo ñeñto'marña napa' atarr nocshensa. Añña nemnen o'ch e'ñe señot ñeññ e'ñe cohuentetsa Yomporecop. Allochñapa' amach soctape'chatsto ñeññ ama cohuenayaye.

20 Allochñapa' Yomporpa' ahuencha' a'huañam̃psonas ñeññ atto atarr shequēnes oneñet, ñeññara Yompor ñeññ e'ñe cohuen yocshatene' yeyochro. Yepartsesharepa'chña Jesucristo e'ñe sa'natenaya.

21 Te'pa' o'ch alla neñotaterrerr añ necartot, masheñ Timoteopa'cho'ña mueneñ o'ch huom̃cha'tas ñaña, ñapa' ñeññ epan netorrena. Allotpa' ñaña añ namo'ts ma'psheño'maret ñetpa'cho'ña mueneñet o'ch huom̃cha'taset ñamet. Puesheñarrpa' añ masheñ Lucio, allotpa' ñaña masheñ Jasón, ñaña masheñ Sosípater.

22 Napa'cho'ña ñeñten sochetsa Tercio, e'ñe name'ñeñoñ Yepartseshar nemneñ o'ch nehuom'cha'tas añ masheñ Pablo po'cartot. Napa' ñeñten quellcaten masheñ Pablo.

23 Masheñ Gayopa'cho'ña muenen o'ch huom'cha'tas ñaña. Na te'pa' e'ñe pa'paclo'tsenen ña, tarro'mar all nechap. Ñapa' atet otenanet chocmach apchenet allohuenet pa'paclo ñeñt ame'ñetsa arr. Ñaña masheñ Erasto mueneñ o'ch huom'cha'tas ñaña. Ñapa' ña tesorerotets arr Corinto, ña añño'tene' quelle anetsocop. Ñaña masheñ Cuartopa'cho'ña mueneñ o'ch huom'cha'tas ñeñtara añ necartot.

24 Yepartsesharepa'chña Jesucristo sa'nataya allohuenes. Ñeñtpa' attetepa'ch Nompore.

*Atto all huañen Yompor po'ñoñ añ cartotpa' ya'ye'chochtatoñepa'ch ora allohueney*

25 Te'ñapa' ya'ye'chochtatoñepa'ch Yompor tarro'mar ñapa' ñach ahuamencat sepene', ñeñt e'ñe atet oten añ cohuen ñoñets alloch yequeshperra. Ñeñtara añ cohuen cotapñats ñeñt neserrpare'tatenes ñeñt e'ñe atet pena Jesucristo ñeñt ahuatoteñ ama eñotpahuo.

26 Tarraña te'pa' Yompor ñeñt ama arromñateshayayepa' muenaterrey o'ch yeñoter ñeñt ama eñotpahuo ahuatoteñ. Ñehua, ñapa' ahuatpa' añ eñotate't ñeñt a'mta'yesaye't po'ñoñ, ñetñapa' ahuo'ch quellquenet ñeñt atet eñotatenanet Yompor. Attochña yeñoter yaña, ama't ñaña allohuen pa'namen acheñenesha';



allochñapa' attoch e'ñe yame'ña'huerra ora  
erraparen, ñeñtey pa'namen acheñey.

<sup>27</sup> E'ñe puemuerẽñotey Jesucristo  
aye'chochtataretepa'ch Yompor errponohuañen,  
ñeñtara Yompor ñeñt ñapueñ e'ñe eñotañtetsa.  
Ñeñtpa' attetepa'ch Nompore. Allohua huañ añ  
necarta.

*Pablo*

**Yompōr Po'ñoñ ñeññ attō Yepartseshar  
Jesuscristo e'ñe etserra a'pōctaterrnay  
Yomporesho  
New Testament in Yanasha' (PE:ame:Yanasha')**

copyright © 2008 Wycliffe Bible Translators, Inc.

Language: Yanasha'

Translation by: Wycliffe Bible Translators, Inc.

Yanasha'[ame], Peru

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Yanasha'

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 28 Dec 2024 from source files dated 29 Jan 2022

fa985bb4-fad0-5968-9ee4-626b89cba24f